

APOCALIPSIS

Jesucristo Ihiifusuuno.

1 Moocaani Jesucristoco aciuhi diibo idudicamaajeminaaco ihifusuqui goovano iicajinehejeque. Jaanoco Jesucristo ifusuuhi idudicamaajeminaafico Juaco itoomominaafico agalluubofeenedi. ² Jaabo uujoho Jua miyaanoco jiiibuguuhi paryi aatyimeunoco, bu Moocaani iijico icano Jesucristo onoonofoenedi.

³ Imicani iicamo jihaameque ihiifinico. Tolliro bu imicani iicamo Moocaani jihaamefañodi ihiimaanoco uguubunicimoro imino jihaamefaño onoonoco omoonimo. Miiro tufucu fiitivucuuhi.

Jua Moocaani Ijaminaadi Caatinihi.

⁴ Uujoho Jua caatinihi Moocaani iijano Asia jiiijeri sahuse juugahuseti mijaaci icano iicajahajeminaadi. Jaamo amiihai magaayici Moocaani imino omooninoco, bu sajeebii icaco aacinoco icano. Jaabo Moocaani iicaabo bu diiboro iicaubo, bu diiboro asaajiibo icano. Bu tolliro sahuse juugahuseti miimisiici icano imino gajjami Moocaani aivoji icaga imefeeneri iicamo aacinoco magaayici. ⁵ Bu tolliro Jesucristo aacinoco magaayici. Diibo miyaanoco iijiiibogoobo, bu iguijevemefeeneti iticoni ubuheeteubo. Jaabo jiiinjeminaa aivojito aivojiiibo iicaabo. Jaabo Cristo miihaico agaiiiboro itiijeheri mohimitico nitiuhi. ⁶ Jaaboro miihaico aivojitoti, bu sacerdoteti icano eetavuuhi diibo Caani Diosco mejeecivequi. Jaabo jaafa mitya, bu cahacisu icano icahi fahiijivaro finiratio. Fine.

⁷ Memeeeci oono Cristo aimuufaifeenedi saaji. Jaaboco famooro atyimeji, bu diiboco ahaamiimo atyimeji icano. Jaaboco paryi jiiinjeminaa aatyimemere taaji. Jiihi tolliji. Fine.

⁸ Uujoho imegaobo, bu allivioobo icano, abecedario iticoni A iicabadi, bu allibati Z iicabadi iicaabo, noobo Jesu Aivojiiibo Moocaani sihidi ejeevaabo. Diibo iicaabo, bu iicaubo, bu asaajiibo icano.

Cristo Imi Gaija.

⁹ Uujoho Jua miyaavogofaño amiihai nahabo. Jaabo amiihaima sano idaasuno icahi, bu Moocaani aivojifaño icahi, bu tolliro jaabicico Jesucristo aacinofaño icano. Jaabo uco icivojaaniujirunohachuta uco gañiiimo Patmo onoochugaivi Moocaani iiji Jesucristofañodi miyaano iicanoco iijiiibeguehicaunohalliti.

¹⁰ Jaanaaca Aivojiiibo fucu jaguisifucusumi uujoho Moocaani Gajjafeenedi esamaaihicaunaaca tabujinaagoti sefano guubuvusuuno miriicu ojibadi. ¹¹ Jaano uco nuuhi:^d Jino adaatyimeneque aamefaño caatini. Jaaboro Asia jiiijeri sahuse

a 1.11: Sahaamefaño janaanici jilli ficuumo: Uujoho imegaobo, bu allivioobo icano A, Z icano iicabadi, onoonoco.

juugahuseti mijaaci icano iicajahajejaagovi gallu. Jino imomo iicajahajejaagovi; Efeso, Esmirna, Pergamo, Tiatira, Sardi, Filadelfia, Laodicea icanojaago, noonoro.

¹² Jaaneguiiha acafesaavoboro meeciuihi: ¿Miiijoho ico, fine, uuma iimaahi? nooboro. Jaabo atyimeuhi sahuse juugahuseti minooci icano cuugahu ficuta iicuno oro eetavotaco. ¹³ Jaanofeeneri Miyaminaafibadi Ifivuubo ifibadi iicaaboco atyimeuhi. Jaabo itihaicivi ifotocinichehuco jiiiciniiboco jaachehu oro niivigaimeeheri siyiciniuhi ifeeyijevi.

¹⁴ Jaabo nigaijeeneu aivo seseene jadiotobadi. Jaanoti ihaalliinou ciijigauihunobadi jeevauhi. ¹⁵ Jaanoti itihaiñou namecuno ifuvusuhi bronze aparyicisucinobadi, ciijigaifañodi eheetavocininobadi. Jaanoti ico sefano guubuvusuhi sihidi guisino uguubuvusunicibadi. ¹⁶ Jaanoti imiyanaagohusefaño icaumo meeciri sahuse juugahuseti miimisiici idiimo. Jaanoti iijifañoti inoociniga niisuga siijevaga fahigovahaciti siijevasuciniga. Jaanoti ihime nihiba sefano aachicinisumi iicabadi jeevauhi.

¹⁷ Jaaboco aatyimeuneri iguiinovi acutuuihi chuumuhubadi. Jaarunaaca imiyanaagohuseque tahallivi ifcuuboro uco nuubo: Diguetejirahana Uujoho iticonioobo, bu diiboro allivioobo iicaabo icano. ¹⁸ Uujoho iicaabo guijeveurahi. Jaaruubo buheehi, ufucuro milli icacutiibo iicaqui. Jaabo uujoho guijeve janaanici mityacuuihi. Jaaneguiiha guijeveminaa iicahigo uudi sihidi jeevatino. Jilli iimogobadi moonijirahi. ¹⁹ Jaaneguiiha jino adaatyimeneque caatini, jino jisumi icanoco, bu ufucu icajinoco icano. ²⁰ Jino tamiyanaagohusefaño sahuse juugahuseti miimisiici icamo meecirico adaatyimeme agaajaratino jilli eneejiruno: Jaamo diito meeciri sahuse juugahuseti mijaaci icano Moocaani iijano jiiibogominaaditi, eneejiruno. Jaanoti bu sahuse juugahuseti minooci icano cuugahu ficuta iicuno oro eetavota jilli eneejiruno: Sahuse juugahuseti mijaaci icano Moocaani iijanoco, eneejiruno.

Moocaani Iijanojaagovi Iijico Agalluuno: Efeso cuumijaagovi Iijico Agalluuno.

2 Efeso cuumiri Moocaani iija iicaja jiiibogominaafidi caatini: Jilli noobo imiyanaagohusefaño sahuse juugahuseti miimisiici icamo meecirima iicaabo, bu tolliro sahuse juugahuseti minooci icano oro eetavota cuugahu ficuta iicunofeenedi iigooabo icano: ² Uujoho gaajahi paryi fanoovaaco edeetavehicanoco, bu sefano dudidamaajeque edeetavehicanoco, bu adaabicichicanoco icano. Bu tolliro gaajahi iimitimoco adaabicitinoco. Bu uujoho tolliro gaajahi Moocaani galluminaa eneehicarumo miyaano iicatimoco iijoho inisuuboro bañiminaa iicanoco agaajacinoco. ³ Jaabo iijoho sihidi daabicichicahi, sihidi idaasuno dicahicahi, bu uuguiiha sihidi dudidamaahicahi niinovatotiibo icano. ⁴ Jaarunaa dihallivi icano sano: Miiro iticoni imiyaavuguusumi uco sihidi gajjuuhi. Jaaruubo jisumi miidinoro gajjicuuihi. ⁵ Jaaneguiiha deesafoto iticoni edeesamaaiunoco. Jaaboro difico dimibachuubo iticoni omoonihicaubadi mooni. Jaanoti tolli omoonitihachiiji dijaagovi ofooboro dicuugahu iicuco idiiti dumitiiciji, dihimitico edeevesutihachiiji. ⁶ Jaarunofaño jino iimino dihallivi icahi, Nicolaitami omooninoco idiiheguene. Jaanoco bu uujoho jiiheguuhi. ⁷ Amiihai nohojima mihicamo muguubu jino Moocaani Gaija, Moocaani iijanominaco onoonoco: Mityano iicamoco fiivo imoho Moocaani gohasihalliti icaho noovatati machusuji.

Esmirna Cuumijaagovi Iijico Agalluuno.

⁸ Esmirna cuumiri iicaja Moocaani iija jiiibogominaafidi caatini: Jilli noobo imegaooabo, bu diiboro allivioobo icano iicaabo, iguijeveuruubo,

siino ubuheeteubo: ⁹Uujoho gaajahi paryi ijoho omoonihicanoco, idaasuno idiicahicanoco, bu fanoovati ucuujivaachunoco icano. Jaaruubo ijoho jinejete cuujivaachutihi. Tolliro bu uujoho gaajahi: Miihai judiomi, unuurumo iiditi imitino ihiimaahicanoco. Jaamo judiomi unuurumo jilli Satanas iji igaivominaaro. ¹⁰JaaneGUIIha diguetedino idaasuno idiicajinoti. Miiro iji amiihaiti saathoco civojafaño jiihacusuji. Jaamo paryi amiihai minisucafetehi. Jaamo fahuseeci fucuva ticovovi idaasuno mihicaji. Jaarunofaño suufenitiibo diica iguijevejinohachuta. Jaachijji toono jaada ico uujoho fiivoco aciji. ¹¹Amiihai nohojima mihicamo muguubu jino Moocaani Gaija, Moocaani iijanominaaco onoonoco: Mityano iicamo iguijeveme cijigaifaño feejitih.

Pergamo Cuumijaago Iijico Agalluuno.

¹²Tolliro bu Pergamo cuumiri iicaja Moocaani iija jiihogominaafidi caatini: Jilli noobo iniisuga fahigovaciti isiijevasucinigama iicaabo: ¹³Uujoho gaajahi paryi ijoho omoonihicanoco, bu gaajahi Satanas atajiihahigo ijoho idiicanoco. Jaaruubo ijoho uco jeevesutiibo diicahicahi. Bu tamiya jiihogominaafi Antipa onoboco amiihaifeenevi oono Satanas iicamañovi agaicaaasumi uco imiyaavogonoco jeevesutiibo diicahicahi. ¹⁴Jaarunofaño dihallivi fiivaano icano: Toono Pergamo cuumivi iima iicamo saathoco Balaam jiihogoco jeevesutimo icamo. Jaabo diibo Balaam onobo Balac onoboco jiihiinuhi israelmi imitico imooniqui jihovo caanimi jeevivo asimico uduuneri, bu gaigoomima imitinoono iicaqui icano. ¹⁵Tolliro bu iima icamo oono Nicolaitami jiihogoco jeevesutimo iicamo, toonoco uujoho jiiheguene. ¹⁶JaaneGUIIha iimitico mejeevesu. Jaanoti mejeevesutihachijji goovano amiihajaago feeji. Jaaboro diitoma amocajiji taajifañoti ihiinoga niisuga fahigovahaciti isiijeva iicagari. ¹⁷Amiihai nohojima mihicamo muguubu Moocaani Gaija, Moocaani iijanominaaco onoonoco: Mityano iicaaboco toovono iicamo manati machusuji. Jaaboro diiboco aciji seseeyi guisiyico. Jaayihallivi bohono imomo caatiniciniji. Jaamomoco miiijoho gaajajitihidi idiiboro toonoco agaayiciibo gaajaji.

Tiatira Cuumijaagovi Iijico Agalluuno.

¹⁸Tolliro bu caatini Tiatirari Moocaani iija iicaja jiihogominaafidi: Jilli noobo Moocaani Achi oono ihaallino cijigaiguiihunobadi iicaabo, bu itihaiño bronze aparyicisucinobadi iicaabo: ¹⁹Uujoho gaajahi paryiicino ijoho omoonihicanoco, gajjima idiicanoco gaajahi, bu dimiyaavogoco gaajahi, edeecivehicanoco, dijaabicico icano. Bu gaajahi iticoni omooniuo janaanacivi jisumi omooninoco. ²⁰Jaarunaaca sano icahi dihallivi. Oono Jezabel onogo: Moocaanijaagodi iimaahi, onogoro tajeecivominaaco iijibegueneri abañihicagoco adaabicihicanoco. Diigo jiiibeguehicahi diitoco gaigoomima imitinoono iicaqui, bu tolliro jihovo caanimi jeevivo asiminoco iduuhicaqui. ²¹Jaagoco uujoho teemehicarahi iimitico ijeevesuqui. Jaarunofaño ihajevaco jeevesuhicatigo. ²²JaaneGUIIha diigo omoonihicanoco diito ejeevesutihachijji diigoco uujoho guihuvasuji, diigojaago efeehicamo idaasuno iicaqui. ²³Jaaboro diigo seemeque gaisiraiciji. Jilliti paryiicino Moocaani iijanominaa gaajaji uujoho miyaminaa esamaajeneque paryi agaajanoco, bu paryi ijeebiinofaño iicanoco agaajanoco icano. Jaaboro paryi amiihaico amiihai

moomonihicano jaadaco aciji. ²⁴ Jaanoti bu amiihaiti saatoho toono Tiatira cuumiri mihicamo tobogoco mihimogotimo, bu oono diito sihidi ejevano agaajaratino Satanas iiji eneehicanoco minisutumoco neehi: Sibogoco siino amiihahallivi ficutihi. ²⁵ Jino toonoma mihicanoco imino mificu uujoho tahi asaajinohachuta. ²⁶ Jaaneguiiha mityano iicamoro uujoho iimogonoco eetavomoro nijequevi iifotomoco aciji mityaco jiinijeminaahallivi. ²⁷ Jino uco Guihirubi mityaco aacibadi. Jaamo jiinijeminaaco tajiibaji sefano jigaiñehiri nifaqui illunoco magasuucunicino iicabadi. ²⁸ Jaamoco bu cuujetavio meecirigaoco aciji. ²⁹ Amiihai nohojima mihicamo muguubu Moocaani Gaija, Moocaani iijanominaaco onoonoco.

Sardi Cuumijaagovi Iijico Agalluuno.

3 Tolliro bu caatini Sardi cuumiri iicaja Moocaani iija jii bogominaafidi: Jilli noobo sahuse juugahuseti miimisiici idiino Moocaani gajajama iicaabo, bu tonoodimoro imeecirigaimimo iicaabo: Uujoho gaajahi paryiicino iijoho omoonihicanoco, bu saatoho: Buheebe, ico eneehicarunoco. Jaarunaa ico dijeebii iguijevecunoco uujoho gaajahi. ² Jaaneguiiha deesiciniiboro sefatusu imino omooninoco, miiro oono fiiticuuno minoco imitasuquiguiiha. Miiro uujoho gaajahi toono iijoho omoonihicano Moocaani imegavi imino iicatinoco. ³ Jaaneguii desafoto oono jii bogoco agaayiciunoco deevesudino. Jaaboro dihimitico deevesu. Jaanoti edeesiciniitihachiiji oono nanivaminaafi ofoonicibadi gaajaciratino uujoho dijaa feeji ico dihimitihalliti aamiqi. ⁴ Jaarunofaño iima icamo tahi Sardi cuumivi miidimo imino iicamo imitico eetavotimoro iicamo. Jaamo uuma sesechehujefaño ijicamaaimoro igueji imino iicamaño. ⁵ Jaamaño mityano iicamo sesechehujefaño jicucafeteji. Jaamo ifinijitino fiivoma iicamo momoco caatinihi fiivohaamefaño. Toohaamefañoti imomoco fillujitih. Jilliro diitoco Guihirubi imefeenevi, bu itoomoinaa imefeenevi icano: Diitoco uujoho gaajahi, neeji. ⁶ Amiihai nohojima mihicamo muguubu Moocaani Gaija, Moocaani iijanominaaco onoonoco.

Filadelfia Cuumijaagovi Iijico Agalluuno.

⁷ Tolliro bu Filadelfia cuumiri iicaja Moocaani iija jii bogominaafidi caatini: Jilli noobo imiibo, aivo miyaabo iicaabo, aivojiibo David llavema iicaabo. Jaabo afaayicinoco miijoho fabaacujitirahi, bu afabaacininoco miijoho faayicijitirahi icano: ⁸ Uujoho gaajahi paryi iijoho omoonihicanoco. Jaabo uujoho dihimegavi guhugaco faayicihii diibeguequi. Jaanoco miihaiñooba jilli: Diibeguedino, neejitirahi. Miiro sihidi sefati ruubo tajiibogoco agaayiciiboro uco tuunamaaitih. ⁹ Jaaneguiiha Satanas igai vominaaco galluji: Miilai judiomi, noomoro abañifihicamoco. Jaaboro diguiinovi diitoco tajiibaji imemuiinamaaiqui, toonoti ico uujoho agaijinoco igaajaqui. ¹⁰ Jaanoti uujoho atajiibanoco imino moonihii iijoho fanoovaaco adaabiciibo. Jaaneguiiha bu ico uujoho imino teemeji nisufucu paryi jiinijehallivi asaajinoti, paryiicino jiinije miyaminaaco nisquui. ¹¹ Goovano saaji. Jaaneguiiha imino ficu iima iicanoco, sita dihacitaco dumitiicidino. ¹² Jaaneguiiha mityano iicamoco uujoho Guihirubi iijafaño ficuji tooja imahacinobadi iicaqui; jaamo tahigoti ufucuro inuucutimo iicaqui. Jaamohallivi uujoho caatiniji Taacaani momoco, bu Taacaani cuumi momoco icano. Jaacuumi Moocaani niquejefañoti asaacuumi momo bohono Jerusale onoocuumi. Tolliro bu uujoho diitohallivi tamomo

bomomo iicamomoco caatiniji. ¹³ Amiihai nohojima mihicamo muguubu Moocaani Gaija, Moocaani iijanominaaco onoonoco.

Laodicea Cuumijaagovi Iijico Agalluuno.

¹⁴ Tolliro bu caatini Moocaani iija Laodicea cuumiri iicaja jii bogominaafidi: Jilli noobo aivo miyaabo iicaabo, miyaanoco enee fiibo, diiboti paryi Moocaani ifiivusuno atanoo ciniibo: ¹⁵ Jaabo uujoho gaajahi ijoho paryi omoonihicanoco. Jaabo ijoho miidino miyaavogoma idiicaabo miivi nifaihu aigucufaihubadi edeevanoco gaajahi. ¹⁶ Jaaneguiiha iijifañoti foomovaiba iicafaihuco agañinibadi ico uujoho esicinihi. ¹⁷ Miiro: Uujoho sihidi busumijema icahi, bu uuma aivo imino fono neehicahi, bu jinejebati ucuujivaachutihi, neehicahi. Jaaruubo ijoho gaajacitihi idaasuubo idiicanoco, imo icama idiicatinoco, bu cuujivaachuma idiicanoco, dihaalliinoma achahanoco, bu botiibo idiicanoco icano. ¹⁸ Jaaneguiiha ico uujoho neehi: Uuti naaje oroco ciijigairi imino imibachucinunobadi iicano miyaavogoco. Jaabo miyanotiro sihidi busumijema diicahi. Bu jaaboro uuditi naaje eseseene gaachehunoco. Jaabo idicamaaiboro nucufesuno sicaibo diicacujitihi. Tolliro bu uuditi aalliino taabutaco anaajebere dihaalliinofaño ficu. Jaabo imino daatyimehi. ¹⁹ Uujoho agaijimoco ibahi, aamihi icano. Jaaneguiiha aivo quehecuno diicaabo dihimitico deevesu. ²⁰ Meeci jino uujoho dihimegari julleecinihi coovaaboro. Jaanoco cajaanoyohacho uco uguubuuboro: Tajaa disaa, onoboma icaji, bu diibo uuma icaji icano.^b ²¹ Jaaneguiiha mityano iicamoco uujoho tahaivoji icagahallivi tacojivi casihacuji, oono uujoho mityano iicamaño Guihirubima ihaivoji icagahallivi acasiivobadi. ²² Amiihai nohojima mihicamo muguubu Moocaani Gaija, Moocaani iijanominaaco onoonoco.

Niquejefaño Moocaanico Iimono.

4 Jinobuunati emeciubo atyimeuhi niquejefaño guhuga faayicinihugaco. Jaanaaca oono uuma miriicu ojibadi iticoni ihiimaauno uco nuuhi: Juu caamovi disaa, jinobuunati iicajinehejeque ico iifusuqui.

² Jaasumiro uujoho sano Moocaani Gaija mityaguinovi minifutuuhi. Jaabo atyimeuhi aivoji icaga niquejefaño iicagaco. Jaagahallivi saafi giciniiboco atyimeuhi. ³ Jaanohalliri igiciniibo ifi ifuvusuhi namecuno jasje onoono guisiyi namecubadi, bu cornalina onoono guisiyi namecubadi icanoco. Jaagahallidi bu tihi cajetaciniuhi esmeralda onoono guisiyi namecubadi inamecu icaabo. ⁴ Jaagahallidi bu sigaa je veinticutrodigaava gicinigaa je icauhi. Jaagaajehallivi iticovoocivi quillahuto icauhi. Jaamo sesechehujefaño jicucuuciniuhi, bu ingainohalliri icauno oro eetavota chaahimigano icano. ⁵ Jaagafañoti anamebanoro sefano sisiimi guubuvusuhicauhi. Bu jaaga imegati nifotocinihicauno sahuse juugahuseti minooci idiino cuugahunu. Jaano toono Moocaani gajano sahuse juugahuseti minooci idiino icano. ⁶ Jaaga imegavi bu icauno muuaibadi jeevano jacuno sinaagonovi foovono iifuvusuno. Bu jaagahallidi icaumo igueenemehejedimova fahigovati sihidi ihaalliinoma iicaumo. ⁷ Jaamoti saafiu leonbadi jeevauhi. Jaanoti

b 3.20: Griego iijiri noono: Meeci jino uujoho guhuga imegari julleecinihi tetecuuboro. Jaanoco cajaanoyohacho uco uguubuuboro iguhugaco afaayicimo iijafaño jicafeteji diiboma imachuqui, diibo bu uuma imachuqui icano.

allivioobo torobadi jeevauhi. Jaano allivioobo miyaminaafi imebadi jeevauhi. Jaano allivioobo ciimimi mogaaje agahafotoobobadi jeevauhi.

⁸Jaamo paryi diito iticovoocivi sahuse juugahuseti sacu idiino ijjecunoma icauhi. Jaamo ifi sanohaalliineriro gahaficiniuhi alliomototi fañoomoti icano. Jaamo fucuhachuta, cuujehachuta icano suufenitimo neehicauhi:

Imiibo, imiibo, imiibo, Aivojiibo, Moocaani sihidi ejeevaabo.

Diiboro iicaubo, bu diiboro iicaabo,
bu diiboro asaajiibo icano, noomoro.

⁹Jaamoro diito ihaivoji icagafaño igiciniibo ufucuro ifinijitiiboco acahacisusumi, iimosumi, obocigosumi icano ¹⁰oono veinticuatrodimó quillahuto iicamo diibo imegavi ememuiivomoro imehichi ono ufucuro ifinijitiiboco. Jaamoro diibo aivoji icaga imega ichaahimiganoco atafusumoro neehicamo:

¹¹Aivojiibo Moocaani, ijyoho aivo sihidi edevamaño gaayici; cahacisuco, bocigoco, mityaco icano, ijyoho fanoovaaco edeetavumaño, ijyoho idiimogomaño ifiivunoro icano, noomoro.

Afaayiciratino Aame.

5 Jaadi atyimeuhi ihaivoji icagahalliri igiciniubo miyanaagovi usefaño aame paimicinihaame fahigovaaciti caatinicinihaameque. Jaahaame sahuse juugahuseti minooci idiineri kuhufono sisiciniuhi. ²Jaanaa guubuuhi Moocaani toomominaafi sefano idilluhicaunoco: ¿Cajaan fine aivo iimiibo isisitaaco udubaiciiboro jihaameque faayicijirahi? nooboro.

³Jaarunofaño niquejefaño, bu jiiniijehallivi, bu jiiniijeguiino icano mihihañooba aivo chahauhi toohaameque afaayicimoro emeeciirumo.

⁴Jaaneri uujoho sihidiro taahicauhi. Sano imifitimoro iicauneri toohaameque afaayiciiboro jilli ajashunogayi emeeciiruubo achahauneri.

⁵Jaanaa quillahutoti saafi uco nuuhi: ¡Taacudino! Miuro Juda cuumi Leon noobo, aivojiibo David Iyaachimihaiobo iicaabo fanoohimitico guinonicuui. Jaaboro paryi toohaame sisitaaco udubaiciiboro ifaayiciqui.

⁶Jaanaaca ihaivoji icaga, bu igueenemehejedimova iicamo, bu quillahutofeenevi icano atyimeuhi saafi Corderobadi iicaabo julleeciniuboco. Jaabo agaicauciniibo ifibadi ifi iifuvusuuhi. Jaabo sahuse juugahuseti minooci idiino iinicunoma icaubo, bu tonoodinoro icauno ihaalliino. Jaano toono ihaalliino sahuse juugahuseti minooci idiino iicano Moocaani gaijano paryi faajiiniijehalliviro agalluuno. ⁷Jaanaa diibo Corderobadi iicaabo ufuuboro ihaivoji icagahalliri igiciniubo miyanaagohusefañoti toohaameque icijeuhi. ⁸Jaahaameque gaayiciubaaca igueenemehejedimo iicaumo, bu veinticuatrodimó quillahuto iicaumo icano diibo Corderobadi iicaabo imega memuiinamaaiuhi. Jaamo iquillahuto iticovoocivi iharpanoma icauhi, bu oro guirihillunofaño maaniguijinoma icauhi icano. Jaamo Moocaanita iicamo diiboma ihiimaasumi maaniguijico ijigasuno diibojaa uusunicibadi jeevahi. ⁹Jaamo jiji bohono masijico jilli masivahicauhi:

Ijyoho aivo idiimimaño toohaameque idiiciiboro isisitaaco sinaayu.

Miuro iguijeumaño ditiijeheri diitoco Moocaanidi naajeuhi fahigova miyaminaati, fanoohiiji miyaminaati, faacuumivati, bu fanoojiinije cuumino miyaminaati icano. ¹⁰Jaaboro diitoco

Moocaanidi aivojitoti, bu sacerdotemiti icano deetavehi.

Jaamo diito jiinjehallivi tajiibaji, noomoro.

¹¹ Jaadi emeciubo guubuuhi ajashutimo Moocaani toomominaa ihiimaaunoco, togahallidi, bu igueenemehejedimo iicaumohallidi, bu quillahuto iicaumohallidi icano. Jaamo itoomominaa aivo ajashuutimo millones y millonesdimo iicamo sefano neehicauhi:

¹² Jaani Corderobadi iicaabo agaicaaucafutuubo aivo iimimaño,

jaafa gaayiciibo mityaco, sihidi busumijeque, bu gaajaco,

bu sefaco, bu bocigoco, bu cahacisuco, bu imoco icano, onoonoco.

¹³ Tolliro bu guubuuhi fanoova Moocaani ifiivusuuno niquejefañó iicano, bu jiinjehalliri iicano, bu jiinjeguino iicano, bu muuifaño iicano, paryi tonehejefañó iicano jilli unuuno:

Bocigoco, bu imoco, bu cahacisuco, bu mityaco icano jaafa

acacafetehi oono ihaivoji icagahalliri igiciniiboco,

bu tolliro Corderobadi iicaaboco fahijivaaciviro, unuunoco.

¹⁴ Jaanoti oono igueenemehejedimo iicamo neehicauhi: Jaafa tolli icano, noomoro.

Jaanoti bu veinticuatrodimó iicamo iquillahuto ememuiivuumoro imuumo fahijivaró iicaaboco.^d

Sahuse Juugahuseti Minooci Idiino Isisita Icano.

6 Jaadi atyimeuhi Icorderobadi iicaabo toohaame sisisaati sanooco iticoniibo isinaayuunoco. Jaanaa guubuuhi igueenemehejedimo iicamoti saafi sefano sisi igiiriribabadi: iJuu saabo meeciva! nooboro uco unuunoco.

² Jaaneguiiha emeciubo atyimeuhi caballo sesebeque. Jaabohalliri iicaubo usefano tiibuga icauhi. Jaaboco Moocaani aciuhi chaahimigaco. Jaanoma fuubo guinoniiboro, bu fahijivaró guinoniiboro icauhi.

³ Jaanaa allivio sisisaaco siino Icorderobadi iicaabo isinaayuuno ticovovi guubuuhi igueenemehejedimo iicamoti sifi: iJuu saabo meeciva! nooboro uco unuunoco.

⁴ Jaabo atyimeuhi sicaballo tifaibo ihiinuuboco. Jaabohalliri iicaubo mityaco gaayiciuhi jiinjehalliti sajeebii icaco ifinisuuboro miyaminaaco fahigovavi imoonicasisuqui. Jaaboco Moocaani ajashutimo niisugaco aciuhi.

⁵ Jaano allivionoco bu siino Icorderobadi iicaabo isinaayuuno ticovovi guubuuhi igueenemehejedimo iicamoti sifi: iJuu saabo meeciva! nooboro uco unuunoco.

Jaanegui emeciibo atyimeuhi saafi caballo civooboco. Jaabohalliri iicaubo oovota meecuco gaayiciniuhi. ⁶ Jaanaa guubuuhi igueenemehejedimo iicaumofeeneti unuunoco: Safucuo ducicamaaje jaada trigoti sano kiloviro ifeteji; jaabadiro bu safucuo ducicamaaje jaada cebadati tres kilodinoviro ifeteji icano. Jaanoti diiribanoco, bu vinofaihunoco icano bañamaaisudino, noonoro.

⁷ Jaanobuunati bu siino allivio sisisaaco Icorderobadi iicaabo isinaayuuno ticovovi igueenemehejedimo iicamoti niinoobo: iJuu saabo meeciva! nooboro uco unuunoco.

⁸ Jaaneguiiha emeciubo atyimeuhi saafi caballo guiguivaaboco. Jaabohalliri iicaubo momo Guijeve onoobo. Jaabo dojicuti saabo

d 5.13, 14: (Filipenses 2.9-11)

saafi guijeveminaa iicahigo abajaabo. Jaabo Guijeve onooboco Moocaani mityaco acihi jiniije miyaminaati samañotohallivi diitoco iminaanineri, bu ajebari, bu guihuvári, bu jiniijehalliri iicamo ñihicufino asimiri icano iguijeniqui.

⁹Jaano allivio sisitaaco Icorderobadi iicaabo isinaayuuno ticovovi jeevívoco omoonifinoguiino, iicamoco atyimeuhi Moocaani iiji miyaano iicanoco ijiiibugunohalliti iguijeniumo jeebiinoco. ¹⁰Jaamo sefano jilli neehicauhi: Idiimiibo Aivojiiibo, onoonoco abañitatiibo, ñmihachutahiica diicaji miihaico iguijeniumo jiniijehalliri iicamoco emeeçiiboro ijaadaco adaaciijino? noomoro.

¹¹Jaasumiro diitoco Moocaani acihi seseeneene gaachehunoco. Jaaboro diitoco nuubo: Majaguisihiica jaafahi amiihai nahabomi Cristodi ududicamaaimo ihoovovi ifetehi, jaamoco amiihaico iicaubadiro agaicaaunohachuta, nooboro.

¹²Jaano allivio sisitaaco Icorderobadi iicaabo isinaayuuno ticovovi emeeçiuvo atyimeuhi jiniije sefano amaryibanoro udujavanamaaiunoco, bu nihiba icivono gaachehubadi iminifutuunoco. Jaanoti fucuo nihiba tiijohobadi minifutuuhi. ¹³Bu meeciiri niquejefañoti jiniijehallivi aifuuhi oono imoho noovata seenere sefano guibuhaba iicaneri baavi aaifonicibadi. ¹⁴Bu niqueje sano finiuhi aameque mapaimirubadi. Bu paryi ifabaino, bu ifachugaiño icano simañehejevi jeeneuhi. ¹⁵Jaano ñihicuti jiniije aivojito ifahojinofaño, bu guiisigajinofaño icano fataniinamaaiuhi. Jaamo tahi fanoohaivojitoma, sihidi inihibaminoma iicamehejema, bu amocasiminaa aivojitehejema, bu aivo sihidi ejeevafiimoma, bu paryi faaboho jijovotoma, bu jijovoto iicatimoma icano ¹⁶ifabainoco, ifagajinoco icano neehicauhi: Mohallivi mahaifo. Jaanoro miihaico jaadi johono ihaivoji icagahalliri igiciniibediti mafataani, bu oono sihidi jeevaneri Corderobadi iicaabo aamijino ñihicuti icano.

¹⁷Miio jino sihidi jeevano ahaamijifucu gasecuuhi. ¿Jaanoco bu miiijoho jaabicijirahi? noomoro.

Israel Cuumiminaati ñicimo.

7 Toonobuunati atyimeuhi igueenemehejedimo Moocaani toomominaa paryi jiniijejinibacihalliri jullelleecinimoco. Jaamo igueenemehejedimo iicano jiniije guibuhabaco gaayiciniuhi, jiniijehallivi ajashuno guibuutino iicaqui, bu muuaihallivi, bu imohonohallivi icano. ²Tolliro bu atyimeuhi saafi Moocaani toomominaafi Moocaani iicaabo mityama icaabo aamijijaagoti saauboco. Jaabo sefano coovadiivuushi saatoho igueenemehejedimo iicaumo jiniijeque, bu muuaico icano imitino imooniqui mityaco agaayiciumoco. ³Jilli nooboro: Jiniijeque imitino momoonidino, bu muuaico, bu imohonoco icano Moocaani jeevivominaaco ihimecunoti diitoco Moocaani gaajataco mificutinohachuta icano, nooboro.

⁴Jaamo diito iicafutuumo oovoco jinoodino guubuui: Ciento cuarenta y cuatro mildimo paryi israelmi cuuminoototi. ⁵Jilli faacuumivatoti iicibu. Juda cuumiti doce mildimo oovocafutuui, bu doce mildimo Ruben cuumiti oovocafutuui, bu Gad cuumiti doce mildimo oovocafutuui, ⁶bu Ase cuumiti doce mildimo oovocafutuui, bu Neftali cuumiti doce mildimo oovocafutuui, bu Manase cuumiti doce mildimo oovocafutuui, ⁷bu Simeon cuumiti doce mildimo oovocafutuui, bu Levi cuumiti doce mildimo oovocafutuui, bu Isaca cuumiti doce mildimo oovocafutuui, ⁸bu Zabulo cuumiti doce mildimo oovocafutuui, bu Jose

cuumiti doce mildimo oovocafutuuhi, bu Benjamin cuumiti doce mildimo oovocafutuuhi icano. Jaamo famooro ciento cuarenta y cuatro mildimou.

Ajashutimo Sesechehujefaño Ijicucucunimo.

⁹Toonobuunati emeeciubo atyimeuhi ajashutimo miyaminaaco fanoojiinjeminnaototi, bu simiyaminaaototi, bu faajiva miyaminaaototi, bu faacuumivaototi icano. Jaamo julleeciniuhi aivoji icaga imegavi, bu Corderobadi iicaabo imegavi icano icaumoco. Jaamo aivo ajashutino icaumo oovorautilimo sesechehujefaño jicucucunimo tucojihunoco gaayiciniumo. ¹⁰Jaamo paryi famooro sefano neehicauhi:

Moocaani ihaivoji icagahalliri igiciniiboti, bu Corderobadi iicaaboti icano taajasu saahi, noomoro.

¹¹Jaanaa paryi Moocaani toomominaa julleleeciniuhi Moocaani aivoji icagahallidi, bu quillahutohallidi, bu iguenemehejedino iicaumohallidi icano. Jaamo toga imega jinijehallivi ajavucamaaiumoro Moocaanico iimomo nuuhi:

¹²iFine! Cahacisucu, imo, bu gaaja, bu imino monoono, bu bocigo, bu mitya, bu sefa icano.

Jaafa Moocaanidi icahi fahijivaro icano. Fine, noomoro.

¹³Jaanaaca quillahutooboti saafi uco dilluuhi: ¿Miijoho jino jito sesechehunofaño ijicucucunimo, cuucati asaamo? nooboro.

¹⁴Jaaneguiiha uujoho nuuhi: Aivojiibo iiro gaajahi, nooboro.

Jaaneguiiha uco nuubo: Jito jino sihidi jeevano iidaasufaño di afatyomo. Jaamo imifiiutimoco Corderobadi iicaabo tiijeri iimitusucuumo.

¹⁵Jaamaño Moocaani aivoji icaga imefeeneri icamo. Jaamoro cuujehachuta, fucuhachuta icano diiboco itemplojafaño jeecivomoro icahicahi. Jaamoco ihaivoji icagahalliri igiciniibo imityaguino ficuji; ¿Milli icatimo iicaqui?

¹⁶Jaamo ajebari, bu adufirari icano idaasuno icacujitih, bu nihiba ihaiguucuri diitoco jigasucujitih, bu jinejeba aiguucu diitoco idaasuno moonicujitih icano. ¹⁷Oono miiro Corderobadi iicaabo aivoji iicagafeeneri iicaabo diitoco teemeji ovejamico motoomonicibadi. Jaaboro fiivoco aacino nifaihunojaagovi diitoco satyejiibo, bu jaamo taafiraco Moocaani buusuji icano.

Niino Sisitaaco Isinaayuuno.

8 Jaanaaca Iorderobadi iicaabo niino sisitaaco isinaayuuno ticovovi niquejefaño lliivi icauno fine sano nihiba oovofeene ticovoviro.

²Jaadi atyimeuhi sahuse juugahuseti miimisiici idiino Moocaani toomominaa Moocaani imefeeneri julleecinomoco. Jaamoco iticovoocivi aciuno miriicunoco. ³Jaanobuunati saaubo sifi Moocaani toomominaafi maaniguijino jigasutahiillu oro eetavotahilluma. Jaaboro jeecivobuje imegavi julleevuhi. Jaaboco saafi aciuhi sihidi maaniguijinoco paryi Moocaanita iicamo Moocaanima ihiimaanoma sano Moocaanico ihaciqui. Jaaboro jeecivobuje oro eetavotahallivi ificuuboro ijigasuqui. Oono ihaivoji icaga imega iicabujehallivi. ⁴Jaano imaaniguijinoco ijigasuuno aimuufai itoomominaafi usefañoti Moocaanijaagovi fuuhi sano Moocaanita iicamo diiboma ihiimaanehema. ⁵Jaadi bu imaanijigasuta iilluco itoomominaafi iciuboro tubuje ciijigaicuneri tohilluco agahafusuuboro jinijehallivi ganicaruhi. Jaaneri sihidi sisiimi icauhi, bu jiniije sefano guubuvusuuhi, sihidi namebahicauno, bu jiniije sefano maryibauhi icano.

Miriicuno.

⁶ Jaanaaca sahuse juugahuseti miimisiici idiino iicaumo Moocaani toomominaa iticovovi miriicunoma iicaumo imibaivuuhi iguisiqui.

⁷ Jaadi saafi ticoniuhi miriicuco iguisiubo. Jaano ticovovi jiinjehallivi aifuuno nifaihu ifigatyono guisiyinobadi ejeevano, bu cijigai icano sano tiijohoma caisecinino. Jaaneri samañooje jiinije jigauhi. Jaabadiro bu imohonoti samañoono jigauhi, bu fajjihuti icano.

⁸ Jaanaa allivioobo imiriicuco iguisiuno ticovovi ifabaibadi jeevano jiganoro muuaifaño acutuuhi. Jaaneri samaño muuai tiijohoti minifutuuhi.

⁹ Jaaneri tumuuajefaño iicaumoti samañooto guijeveuhi, bu tolliro cijigai meeneneti samañoono finiuhi icano.

¹⁰ Jaanaa allivioobo imiriicuco iguisiuno ticovovi ajashutino meecirigai niquejefañoti acutuuhi nifotociniiboro tehinoti samañoonohallivi, bu pisirigañoti samañoonohallivi icano. ¹¹ Jaabo momou Namita onoo. Jaaneri paryi nifaihunoti samañoono namitati minifutuuhi. Jaaneri sihidi miyaminaa chuumuhi inifaihu faafaño iminifutuuneri.

¹² Jaanaa allivioobo bu imiriicuco iguisiuno ticovovi nihibati samañoobo jabaavuuhi, bu fucuooboti samañoobo jabaavuuhi, tolliro bu meeciriti samañoobo jabaavuuhi icano. Jaamaño diitoti samaño achicicuutíhi. Jaamaño cuujeti samañoono achicicuutíhi. Jaabadiro fucuti samañoono achicicuutíhi.

¹³ Jaadi emeciubo atyimeuhi saafi Moocaani toomominaafi niquejefenedi ciimimi mogaaje agahafobadi fuuhi, sefano jilli nooboro: ¡Ayii! Idaasucani jiinjehalliri iicamo icaji siino miimisiici, saafi idiinehiica iicamo Moocaani toomominaa imiriicunoco iguisidi, nooboro.

9 Jaanaaca bu allivioobo imiriicuco iguisino ticovovi bu atyimeuhi saafi meecirigai jiinjehallivi aacutuuno. Jaaboco inihicuno oji llaveque aaciunoco atyimeuhi. ² Jaahojico afaayiciuneri tohojifañoti sihidi aimuufai inuuhi gaicuhai aimuufabadi. Jaahoji aimuufairi iinuuneri nihibaco fabaacuuhi. Jaaneri jiinije civutuuhi. ³ Jaano toono ihaimuufafañoti inuumo sihidi chahacami jiinjehallivi gahafomoro. Jaamo mityaco gaayiciuhi iniiqui oono jiinije juuvemi iicabadi. ⁴ Jaamoco tajiibaubo: Jiinije fajjihuco imitino momoonidino, bu jinejebaco, imohobaco icano. Jaanoti idiimocoro miyaminaaco Moocaani gaajatari ihimecunoti agaajaratimoco momooni, nooboro. ⁵ Jaaruumo miyaminaaco muchuumusudino jilliro sahuse nihibava ticovovi mahaivuvusu, nooboro. Jaamo iniino aivo juuvehu iniino aivobadi jeevauhi. ⁶ Jaasumi miyaminaa guijeveque guineji. Jaarumo atyimejithi. Iguijevequi moonirumedi guijeve chahaji.

⁷ Jaamo ichahacami caballomico aamocasivi ifeequi imibachunicibadi jeevauhi. Jaamo nigainohalliri oro chaahimigabadi jeevano icauhi ihmeneu miyaminaa imenebadi jeevauhi. ⁸ Jaanoti imeebaiguino gaigoomi meebaiguinobadi jeevauhi. Jaanoti igaiño jicu igaiñobadi jeevauhi. ⁹ Jaanoti imeehene kuhufunuuhi jigaiñomeehunobadi. Jaanoti bu ijijecuno sefano guubuvusuuhi aamocasivi ofoomo sihidi caballomi icarronoco iguicino uguubuvusuunicibadi, ¹⁰ bu ibuhuno juuvehu ibuhunobadi jeevauhi njequeneti ituunoma iicauno icano. Jaamo toono ibuhunofaño imitya icauhi miyaminaaco sahuse nihibava ticovovi aivono imooniqui. ¹¹ Jaabo ichahacami aivojiibo toono inihicuhoji abajaabuu. Jaabo momo hebreami

iijiri Abadon onoo. Jaanoti griegomi iijiri Apolion onoo. Jaanoti moojiri Finisuminaafi onoo.

¹²Jino imegao idaasu fatyuuhi. Jaarunaaca icanehiica minooci.

¹³Jaano allivioobo imiriicuco iguiisuno ticovovi guubuuhi Moocaani imegari iicano ijecivobuje oro eetavotabuje inicuno igueenemeheje iicaunofaṅoti diiboco unuunoco: ¹⁴Sinaayu oono igueenemehejedimo iicaumo imitino toomominaa Eufrate onoomuaajiniri isisicinimoco, noonoro.

¹⁵Jaamo diito igueenemehejedimo iicaumo sinaayucafutuuhii miyaminaati sanoodimoco iguijeniqui. Jaamo toono horavi, tufucuvi, bu tonihibavi, bu toficabavi icano tolli imooniqui ifiivusuumo. ¹⁶Jaamo amocasiminaa caballomihalliri iicaumo oovo doscientos millones ticovovi iifutuunoco guubuuhi.

¹⁷Jilli uujoho icaballomico gajafeenedi atyimeuhi. Jaamohalliri iicaumo ifeeyijehallivi huhufono jigaiṅo meehu tifaṅo, bu atyivano, bu guiguivano icaneri tifaicusininoma iicaunoco. Jaanoti icaballomi nigainou jicu nigaijadi jeevauhi. Jaamo iijinoti ciijigai, aimuufai, azufre icano ineehicauhi. ¹⁸Jaaneri miyaminaati sanoodimo guijeveuhi toono minooci, sano idiṅo icano imiti diito iijinoti ineehicauneri. Jaano toono minooci, sano idiṅo iicano imiti ciijigai, bu aimuufai, bu azufre icano. ¹⁹Jaamo diito icaballomi mitya icauhi iijinofaṅo, bu ibuhunofaṅo icano. Jaanoti ibuhuno nigacomi jiinimo nigainobadi jeevauhi. Jaaneri imitino miyaminaaco moonihicaumo.

²⁰Jaanoti sanoodimo diitoco idaasuno omoonicuurunoti gujebetimo atajaumo iimitico jeevesuutihi. Jilli suufenitimo imitino gajamico, bu oro, plata, bronze, guisiba, imoho icano eetavota ijimico icano jeevicehicauhi; jaamo ihijimi atyimetimo, bu guubutimo, igotimo icamoco. ²¹Bu tolliro suufeniutimo sitaaco agaicaunoco, bu agaibaninoco, bu gaigoomima imitinoono iicanehejeque, bu ananivanehejeque icano.

Moocaani Toomominaafi Aamegayima Iicaabo.

10 Jaadi atyimeuhi bu sifi Moocaani toomominaafi sihidi jeevaabo, aimuufairi miniciniibo, inigaihalliti tihi cajetaciniuboma niquejefaṅoti inituunoco. Jaabo ime nihibabadi achiciniuhi, bu idiṅo ciijigai imahacinobadi jeevauhi. ²Jaabo usefaṅo aamegayi faayicinihaamegayi icauhi. Jaabo imiyanaagotihaiico muuaihallivi ficuui, jaanoti inaninaagotihaiico jiinijehallivi ficuubo icano. ³Jaaboro sefano coovadiivuubo oono jicu sefano iniiigonibadi. Jaano ticovovi sahuse juugahuseti miimiisici idiṅo sisiimi ojiuhi. ⁴Jaamo isisiimi oojiunoco uujoho caatiniqui mooniunaaca sifi niquejefaṅoti uco unuunoco guubuuhi: Jilli lliivi guubunici oono sisiimi ihiimaanoco. Jaaboro caatinidino, unuunoco.

⁵Jaanaaca Moocaani toomominaafi jiinijehallivi, bu muuaihallivi icano ujulleeciniubo imiyanaagohuseque caamo niquejejaagovi gañiyyiciuhi.

⁶Jaaboro fahiijivaro iicaabo niquejeque, jiinijeque, muuaiṅooco, bu paryi tonehejefaṅo iicamoco icano ifiivusuubo momofaṅodi miyaano iicanoco nuuhi: Tusumi mihicacuui. ⁷Niinoobo imiriicuco iguiisicudi Moocaani esamaaje agaarahicatinico icacuui ijecivominaa, ihiimaaminaa iicamoco unubadi, nooboro.

⁸ Jaanaaca niquejefañoti uuma ihiimaauno siino bu uco nuuhi: Foobo dihicito jaadi Moocaani toomominaafi johono muuaihalliri, jiinjehalliri icano ujulleeciniibo usefaño iicahaame afaayicinihaamegayico, nooboro.

⁹ Jaanegui diibojaa ufuuboro toohaamegayico diiboco dilluui uco ihaciqui.

Jaanegui uco nuubo: Ifaaji machu. Jaano diijifaño imono naamejino iimihubadi. Jaanoti dihibafaño faafaityejino, nooboro.

¹⁰ Jaaneguiiha diibo usefañoti toohaamegayico iiciuboro machuui. Jaano taajifaño imiino iimihu imobadi. Jaanoco amachuuno taabafaño faafaituui. ¹¹ Jaadi uco nuumo: Siino diibogo ajashutino cuuminoditi, jiinjeminaaditi, siijiminaaditi, bu aivojitoditi icano Moocaani onoonoco, noomoro.^e

Miimisiici Moocaaniti Ihiimaamisi.

11 Jaadi uco aciumo noofajicuco metrobadi iicanoco. Jaamoro uco nuuhi: Gañiivo. Oono Moocaani templojaco doovo, bu ijeeceivobujeque doovo icano, bu doovo, ¿naa minoodimo tomañovi ejeecevehicamo miyaminaa icahi? ² Jaanoti idiinocoro igoohasico deevedino tohasi siicumijeo miyaminaaguiharucu iicano. Jaamo diito tuucuumi imino cuumico quicuji cuarenta y dosdi nihibava ticovovi. ³ Jaasumi uujoho tajiibogominaatisico galluji uujoho onoonoco ijiibeguequi mil doscientos sesentadi fucuva ticovovi, civochehujefaño jiicinimisisico.

⁴ Jaamisi diitisi Moocaani jiinije Aivojiibo imega iicahooci olivohooi, bu cuugahu ficuta mihiicuuci icahicuci iicanobadi jeevamisi. ⁵ Jaamisico saatoho imitino omoonigohachiiji diitisi iijiti cijigai iineeji diito iminaaco ijigasiqui. Tolti guijevejimo paryi diitisico imitino imooniqui omoonimo. ⁶ Jaamisi jiinjehallivi Moocaaniti ihiimaanohachuta aigotino iicaqui niquejeque afabaacujino mityama icahi, bu tolliro nifaihuco tiijohoti iminiyujino mityama icahi, bu jiinjeminaaco idaasuno fanoovari imugusumi omoonijino mityama icahi icano. ⁷ Jaamisi idudicamaajeque iimivucuudi inihicuubo oono inihicuhojifañoti asaaboro diiticho moonivaji. Jaabo diitisico iguininoniboro gaicaauji. ⁸ Jaamisi chuumuhuno tuucuumi sihidi ejeevacuumi, Mohaivojiiboco etetecuumi jiilhaifaño acaji. Jaacuumi Sodoma, Egipto icanovi oovicinihi. ⁹ Bu jaamisi ciirajitihimifucuci, safucu, bu sifucutifeenedi icano icajimisi. Jaamisico faaboho miyaminaa, faacuumiva miyaminaa, faajiva miyaminaa, bu faajiinije miyaminaa icamo ihatyimequi. ¹⁰ Jaamisi iguijeveneri jiinije miyaminaa sihidi imobaaji. Jaamo imo imo iicamoro sinehejeque fahigovavi acisasiji; Oono diitisi Moocaaniti ijiibeguehicamisi diitoco idaasuno omoonihicamisi iguijeveneri. ¹¹ Jaarunaa mifucuci, safucu, sifucutifeenedi icano nijequeti Moocaani diitisico siino buheetesuji. Jaamisico paryi aatyimemere sihidi iguetejimo. ¹² Jaanaa diitisico sefano niquejefañoti: Juu caamovi masaa, unuunoco guubumisi.

Jaaneguiiha caamo fuumisi aimuufaifeenedi. Jaanoco iminaa atyimeuhi. ¹³ Jaano ticovovi aivo sefano jiinije amaryibaunerit tuucuumiti fahuseecijaava iicamañoti sajaaro callajaavehicaui. Jaabadiro

e 10.11: Sahaamefaño: nooboro, noono.

tuucuumiviro ajashutino iijano callajaavuui. Jaaneri siete mildimo miyaminaa guijeveuhi. Jaaneri saatoho iguituumoro Moocaani niquejefaño iicaaboco imuuihi.

¹⁴ Jino alliviono imiti fatyehi. Jaano allivio imiti goovajino asaano.

Niino Miriicuco Iguisino.

¹⁵ Jaadi niinoobo Moocaani tomominaafi imiriicuco iguiisuno ticovovi sefano guubuvusuuno niquejefaño ajashutimo jilli unuuno:

Jiinije aivojino Mohaivojiibedi, bu Iristodi icano icacuuihi.

Jaabo tajiibaji fahiijivaro, noomoro.

¹⁶ Jaanaa veinticuatrodimó quillahuto Moocaani imefeeneri ihaivoji icaganohalliri iicaumo jiiñehallivi ajavucamaaiumoro Moocaanico imuuihi, ¹⁷ jilli noomoro:

Ico mihimehi Moocaani sihidi mityama idiicaaboco.

Ijoho idiicaaboco, bu idiicaaboco, bu asaajiiboco icano,

bu dimityaco agaayiciiboro atajiibacuumaño icano.

¹⁸ Miiro jiiñijeminaa dijaa sifiiratehi. Jaarunofaño ijoho

adaamijifucu, bu uchuumucuumoco udugaacujifucu icano

gasecuuihi. Jaasumi dijeecivominaa ijoho onoonoco

ijiibeguehicamoco, bu iidiro icahicamoco, bu dimomoco

obociguehicamoco icano sabadiro sihidi ejeevamehejeque,

bu sihidi ejeevatimehejeque icano adaadujifucu, bu tolliro

jiiñijeque ifinisuhicamoco ifinisujino icano, noomoro.

¹⁹ Jaasumiro niquejefaño Moocaani temploja faayicafutuuihi. Jaaneri Moocaani unuunohaameque ificuuba cajonbaco atyimeuuihi. Jaasumiro sisiimi sihidi namebauhi, jiiñije ñihicuno guubuvusuuihi, bu sisiimi giiriribauhi, bu jiiñije sefano maryibauhi, bu guisiyinojadi ejeevano sihidi sefano aifuuhi icano.

Iñihicuubo Dragon Onoobo, Gaigo Icano.

12 Jaanobuunati niquejefaño jabafirano iifuvusuuno: gaigo nihibari imibocinigobadi aricuno iifuvusuuno, fucuo nihibahalliri julleecinigo, docedimo meeciriri ichaahimiga eheetavocinigaco javucinigo. ² Jaago oovago icago isemevaqui aiveveneri gaibahicauhi. ³ Jaanobuunati bu siino niquejefaño ifuvusuuihi: dragon ñihicuubo tifaibo, sahuse juugahuseti miyiici idiino inigainoma icaubo, bu fahuseecidino inicuno, bu inigaino ticovocivi ichaahimiganoma icaubo. ⁴ Jaabo ibuhuri samañooto meecirico niquejefañoti ubuutuucuboro jiiñehallivi gañiuihi. Jaaboro isemevaqui omooniigo imegavi julleveubo diigo esemevasumiro tooseeque iduuqui. ⁵ Jaago gaifi seemeneque seemevauhi. Jaabo jiiñijeminaaco sefano tajiibaji jigaiñohiri iicanicibadi. Jaabo niquejefaño satyocafutuuihi Moocaani aivoji icagahalliri iicaabojaago. ⁶ Jaanoti igaigo gaauhi sicaihigo icahigovi Moocaani diiguedi imibachuhigo tahi diigoco machuco ihaciqui mil doscientos sesentadi fucuva ticovovi.

⁷ Jaanobuunati niquejefaño idragon fuuhi iyotoma. Jaamoma mooncasiubo Moocaani tomominaa aivojiibo Miguel onoobo iyotoma.

⁸ Jaaruubo idragonco sahigotiro guinoniuomo, bu tahi niquejefaño diito iicajirumaño samaño chahauhi. ⁹ Jaamaño diibo sihidi ejeevano dragonco baavi gañiumo, johono siicijeo jiiñimo oono imomo iji, Satanas iicaaboco. Jaabo jiiñijeminaaco abañihicaaboco iyotoma baavi jiiñehallivi gañiumo.

¹⁰ Jaanaa guubuuhi sefano niquejefañoti unuunoco: Moocaaniti asaano taajasu, bu imitya, bu ihaivoji icano, bu Icristo mitya icano gasecuuhi. Miïro baavi gañiicafutucuubo Moocaanico monahabomihallivi imitino jiiibeguehicaabo fucuhachuta, cuujehachuta icano. ¹¹ Jaaruboco monahabomi guinonicuuhi Corderobadi iicaabo tiihohofañodi, bu Moocaani jiiibogo miyaano iicanoco jiiibeguehicaneri icano. Miïro ifiico gajjiutimo, bu gujiveque iguihiutimo icano. ¹² Jaaneri niquejefaño iicamo imo imo icahi, bu amiihai tahi paryi mihicamo icano. Jaanoti idaasucani mihicaji amiihai jiiinjehalliri, bu muuaifañofaño mihicamo icano. Miïro oono iji tahigo sihidi isifiiratooboro niitehi gueneene iicajitinoco agaajaaboro.

¹³ Jaabo idragonco agaaniunoma iicaabo oono gaifico eseemevaugoco bucasiubo. ¹⁴ Jaanegui diigoco ciimimi mogaaje jijeucucico aciimo jiiinimobadi iicaaboti thesino igaaqui sicaihiigovi diiguedi iimibachuuhigovi. Tahi diigoco machuco ihaciqui mificabaci, bu saficaba, bu sificabatifeenedi icano ticovovi. ¹⁵ Jaago dojicuti jiiinimobadi iicaabo iijifañoti nifaihuco galluui muuaiti ifiivotonoro diigoco ibecasuqui. ¹⁶ Jaarunofaño jiiinije diigoco amusuui, idragon iijifañoti agalluufaihuco aaduneri. ¹⁷ Jaanoma iicaabo diigojaa sihidi isifiiratuoboro fuuhi diigo iyaachimihai aatyvuudimo sanoodimo Moocaani tajiibaco imino omoonimoro, bu Jesucristo jiiibogoco jeevesutimo iicahicaumoma ihamocasiqui.

Iñihicumisi.

13 Jaadi muuai jiiinigaibaahohallivi ujulleveubo atyimeuhi iñihicuubo muuaifañoti inuuboco. Jaabo nigainou sahuse juugahuseti miyiici icano, bu iniicuno fahuseecidinou icano. Jaano iiniicuno iticovocivi ichaahimiganoma icauhi, bu inigainohallivi caatiniciniuno Moocaaniditi idicuno oonoo momo icano. ² Jaabo iñihicuubo jicubadi ejeevaubo, tihaiño jeeji tihaiñobadi jeevauhi, bu iiji leon iijibadi jeevauhi icano. Jaaboco idragon imitya, ihaivoji icaga, sihidi boci iiji icanoco aciui. ³ Jaabo iñihicuubo nigaiti sahiti icauno itujaavo diiboco muchuumusujibadi iicauno. Jaaruno diiboco buuhi. Jaaneri paryi jiiinije miyaminaa ajabafitiuumoro diiboco miyaavuguui. ⁴ Jaamoro idragonco cahacisuumo diibo iñihicuboco mityaco aaciumaño. Jaabadiro bu iñihicuboco cahacisuumo jilli noomoro: ¿Miijoho fine jaani iñihicubobadi jeevahi? ¿Miijoho fine diiboma amocasijirahi? noomoro.

⁵ Bu tolliro diibo iñihicuubo Moocaaniditi idicunoono ihiiamauno jaabicafutuui cuarenta y dosdi nihibava ticovovi tolli imooniqui. ⁶ Jaamaño ticovaubo Moocaaniditi imitino ihiiamaaboro imomoco idicunoono nuuhi, bu diibo iimihijati, bu niquejefaño paryi iicamoti icano. ⁷ Tolliro bu ajaabiciuboro jilli ifiniciubo Moocaanita iicamoma amocasiuboro diitoco iguiinoniunoco. Bu gaayiciubo mityaco fahigova miyaminaahallivi, bu faacuumivahallivi, fanoohiji miyaminaahallivi, bu faajiiinije miyaminaahallivi icano. ⁸ Jaabo diibo iñihicuboco cahacisuumo paryi jiiinjehalliri iicamo oono jiiinije ifiivunotiro diito momono Corderobadi iicaabo agaicaucufutuubo fiivohaamefaño acaatinirautimo.

⁹ Amiihai nohojima mihicamo jinooco imino muguubu. ¹⁰ Sitaaco civojafaño asatyomo, bu tolliro civojafaño satyocafeteji. Jaanoti bu niisugari sitaaco agaicaaumo, bu niisugari gaicaucafeteji. Jilli iicaneguiha Moocaanita iicamo imiyaavogomoro ijaabicihicaqui.

¹¹ Jaanobuunati sifi iñihicuubo jiinjefañoti asaaunoco atyimeuhi. Jaabo iiniicuuci cordero iniicuucibadi jeevauhi. Jaaruubo dragonbadi iimaahicauhi. ¹² Jaabo iticonio ñihicuubo mityaco paryi gaayiciuhi, diibo iticonio ñihicuubo imefeenevi. Jaaboro jiinjijeque, bu toojehalliri iicamoco icano tajiibaubo iticonio ñihicuubo oono sihidi ejeevauno itujaavo ubuhuuboco icahacisuqui. ¹³ Bu tolliro sihidi ejeevanehejeque, bu niquejefañoti miyaminaa imefeenevi jiinjehallivi ciijigaico iniitusunehejeque icano. ¹⁴ Tonehejeque diibo iticonio ñihicuubo imefeenevi omoonihicaunofenedi jiinije miyaminaaco bañiubo. Jaaboro diitoco tajiibaubo diibo iticonio ñihicuubo niisugari agaviriicunoma iicauruubo ubuheeteubo ijico iheetavequi. ¹⁵ Jaadi diibohallivi asaauno ñihicuuboco mitya acicafutuuhi iticonio ñihicuubo ijico eetavuuboco ijeebiico aaciiboro ihiimaasuqui. Jaaboco iimotimoco igaisiraicisuqui. ¹⁶ Jaabadiro bu tajiibaubo paryi miyaminaaco ihoovoco imiyanaagohuseneti, bu ihimecunoti icano ificuuqui; sihidi ejeevatimoco, bu sihidi ejeevamoco, bu idaasumehejeque, bu sihidi inihibamima iicamehejeque, bu miyaamoco, bu jiovotoco icano. ¹⁷ Jaadi miñhaiñooba ticovono naajejitihí diibo oovotama achahamo. Jaano toono diibo iñihicuubo momo, bu imomo oovo icano. ¹⁸ Jaano jino gaajacoro esuhi. Agaajaabo jino iñihicuubo oovoco gaajaci; jino saafi miyaminaafi oovota. Jaano jino seiscientos sesenta y seis.

Ciento Cuarenta y Cuatro Mildimo Amasivano.

14 Jaanobuunati emeeciubo atyimeuhi Corderobadi iicaaboco Sion cuumbaihalliri julleeciniuboco. Jaaboma iicaumo ciento cuarenta y cuatro mildimo miyaminaa ihimecunoti Corderobadi iicaabo momo, bu Caani momo icano acaatiniciniumo. ² Jaadi guubuui niquejefañoti sihidi teehiguiisi uguubvusunicibadi, bu sisi sefano igiiriribanicibadi icano uguubvusunoco. Jaanou sihidi miyaminaa iharpanoco oojisunicibadi jeevauhi. ³ Jaamo bohono masijico masivahicauhi Moocaani aivoji icaga imegavi, bu igueenemehejedimo iicaumo imegavi, bu quillahuto imegavi icano. Jaajico miñhaiñooba aivo gaajahicautihí idiimoro diito ciento cuarenta y cuatro mildimo iicaumo jiinije miyaminaafeenetí atajasucafutuumoro. ⁴ Jaamo diito gaigoomivi ijivuutimo. Jaamaño mihinivatimo iicaumo. Jaamo Corderobadi iicaabo dojicuti feehicahi diibo fahigova ofoohigovi. Jaamo taajasucafutuuhi. Jaanoti Moocaani, bu Corderobadi iicaabo iicamisi gaajacuhi sihidi atajasucafetejinoco. ⁵ Jaamo Moocaani imegavi mihinivatimo iicaumaño diitofaño bañifira atyimerautihí.

Moocaani Toominaa Miimisiici, Saafi Idiino Ijiibogono.

⁶ Jaanobuunati atyimeuhi Moocaani toominaafi niquejeguiinodi ifinijitino taajasujiibogoma icaabo gahafooboco. Jaanoco jiinjeminaaco, bu famoovaaco, bu faajiva miyaminaaco, bu faacuumiva miyaminaaco icano ijiibeguequi. ⁷ Jaabo sefano nuhi: Moocaanico mihiguumoro diiboco mihimo. Miñro jino tufucu gasecuuhi iimitihalliti jiinjeminaaco idaasuno omoonijifucu. Jaaneguiha niquejeque, bu jiinijeque, bu muuaiñooco, bu pisirigañooco icano ifivusuuboco mihimo, nooboro.

⁸ Jaanobuunati bu sifi saauhi jilli nooboro: Acutucuuno, acutucuuno sihidi ejeevacuumi Babilonia cuumi paryi jiinjeminaaco ihajevari iguiricavusumaño, nooboro.

⁹ Jaanobuunati niinoobo saahuhi sefano jilli nooboro: Oono ñihicuuboco, bu ihijico icano, imomoro ihoovotaco ihusevi, bu ihimecuvi icano ificuumococo ¹⁰ Moocaani ñihicuno mooniji. Jaamo idaasuno moonicafeteji cijigai azufrema iicaneri Moocaani toomominaa imefeenevi, bu Corderobadi iicaabo imefeenevi icano. ¹¹ Jaano diitoco idaasuno omoonino aimuufai icaji fahijivaro ufucuro finiratino fucuhachuta, cuujehachuta icano jaguisisuratino diito ñihicuuboco, bu ihijico icano acahacisumoco, bu imomo oovoco agaayicimoco icano. ¹² Jilli iicaneguiiha Moocaanita iicacuumo, diibo atajiibanoco omoonimo, bu Jesuco jeevesutimo iicamo icano jaabicima iicaqui.

¹³ Jaanaa guubuuhi niquejefañoti: Jinooco caatini, noonoro uco unuunoco: Jisumiti imicani icajimo Aivojiibo Cristo imiyaavogomo iguijeveme. Jihi tolli, noobo Moocaani Gaija: idudicamaajeti jaguisijimo, bu imino omoonihicanoti gaajaveechujimo icano.

**Basuta Ujusicunoco Mihicinicibadi Moocaani
Niinofucu Naniji Imifimoco Imino Imooniqui, Jaanoti
Imitifimoco Imitino Imooniqui Icano.**

¹⁴ Jaadi emeeciubo atyimeuhi aimuufai seseeneque. Jaanohalliri giciniubo saafi miyaminaafi seemenebadi jeevaabo. Jaabo ichaahimiga oroogaco inigaihallivi javuciniuhi, bu meeyuhu sijjevahuco gaayiciniuboco.

¹⁵ Jaanaa templojafañoti saafi Moocaani toomominaafi inuuhi. Jaaboro sefano nuuhi oono aimuufaihalliri igiciniuboco: Dimeeyuhuri quiticibo basuta noovataco diicicu tufucu mihicacuui. Jino jiinije basuta noova tifaicuui, nooboro.

¹⁶ Jaaneguiiha aimuufaihalliri igiciniubo imeeyuhuco jiinijehallidi iguiyiciuboro jiinije basuta noovataco iciuhi.

¹⁷ Jaanobuunati bu sifi Moocaani toomominaafi inuuhi niquejefaño iicaja templojafañoti, tolliro bu ihusefaño sijjevahu meeyuhu icahuma.

¹⁸ Jaanaaca bu sifi Moocaani toomominaafi Moocaani jeevobujejaagoti saahuhi cijigaihallivi mityama iicaabo. Jaaboro imeeyuhu sijjevahuma iicauboco sefano nuuhi: Disijeva meeyuhuri quiticibo diici jiinije baacuco oono icivucunoco, nooboro.

¹⁹ Jaanegui diibo imeeyuhuco jiinijehallidi iguiyiciuboro iciuhi jiinije baacuco. Jaaboro ajashutiba Moocaani sifiira nitibafaño gañiuihi imahamicafetequi. ²⁰ Jaanoco cuumiti buhigovi mahamicafutuui. Jaano initibafañoti tijoho ucuuno trescientos kilometrohachuta ifutuui fahigovavi, bu ifaicuva ifutuui caballomi ujulleecinimo iijihachuta icano. Miyaminaa tijoho eneejiruno baacutofaihuviro oovicafutuui.

Niino Imiti Icajino.

15 Jaadi bu siino atyimeuhi niquejefaño iifuvusuuno jabafiranoco. Jaanou sahuse juugahuseti miimisiici idiino Moocaani toomominaa iticovocivi niino idaasuno omoonijnoma iicaumo. Jaamo imivusuhi Moocaani sifiirataco.

² Tolliro bu atyimeuhi muuai vidriobadi jeevano cijigaima icano foovono sinaagonovi iifuvusunoco. Jaanojiniri jullelleecinimo Moocaani aaciuno iharpanoma johono ñihicuuboco, bu ihijico icano iguiinonimoro, bu diibo momo oovotaco agaayicitimo. ³ Jaamo masivahicauhi Moocaani

jeecivominaafi Moise masijico, bu Corderobadi iicaabo masijico icano jilli noomoro:

Aivo ajashutino, olli jeevatino paryi ijoho edeetavono Aivojiibo Moocaani sihidi imityaabo. Jaana diica aivo tiqvevehi, bu aivo miyaano icano, ijoho jiinije miyaminaa Aivojiibo idiicaabo.

⁴ ¿Miiijoho bu ico, Aivojiibo, ñihicugotimo icajirahi? Paryi famooro ico cahacisuji. Miiro ijoho idiiboro imihinivatiibo.

Jaamaño fanoojiinije miyaminaa asaamoro ico imeji, aivo ijoho imino omoonino aatyimecafotomaño, noomoro.

⁵ Jaanobuunati emeciubo atyimeuhi niquejefañoti temploja iimimañoa iicauja afaayacafutuunoco. Tomaño vi tajiiba guisibabujecico ificuhicaumaño. ⁶ Jaamaño iimimañoti inuumo diito sahuse juugahuseti miimisiici idiimo Moocaani toomominaa Moocaani idaasuno omoonijnoma iticovoocivi iicaumo. Jaamo imichehuje, aricuchehuje, mihinivatichehujeña jiiciniumo. Jaamo oro nivigaimeeheneri ifeeyijenehallidi siyiyiiciniuhi. ⁷ Jaamoco igueenemejedimo iicaumoti saafi aciuhi iticovoocivi oro guirihillunoco. Jaanofaño Moocaani fahiijivaro iicaabo sifiira gahaficininoma. ⁸ Jaasumiro iimimaño onoomaño aimuufairi gahafuuhi Moocaani sihidi ejeevano, bu mityati icano asaano. Jahigo miihañooaba jicafutuujitirahi onoo sahuse juugahuseti miimisiici icano iicaumo Moocaani toomominaa iticovoocivi Moocaani idaasuno omoonijnoco asatyumo toonoco omooniumo imivuutinohachuta.

Moocaani Sifiira Guirihilluno Aamitaditi Ijiiibogono.

16 Jaanaa guubuui templojafaño iicano iimimañoti Moocaani toomominaa sahuse juugahuseti miimisiici idiimo iicaumoco sefano unuonoco: Mofoomoro jiinijehallivi mutucaruto toono sihidi ejeevano Moocaani sifiira iguirihillunofaño iicanoco, noonoro.

² Jaaneguiiha diitoti saafi ticoniuihi jiinijehallivi iguirihillufaño iicaunoco utucaruubo. Jaaneri paryi miyaminaa oono ñihicuubo oovotaco agaayicumoco, bu ihijico iiumumoco icano fiivuuno idicuno ciinisino sihidi aivonoono.

³ Jaanaa allivioobo bu iguirihillufaño iicaunoco muuaiñoña tucaruuhi. Jaaneri inifaihuno chuumuhi tiihohobadi minifutuuihi. Jaaneri paryi tumuuajefaño iicaumo chuumuuihi.

⁴ Jaanaa allivioobo bu iguirihillufaño iicaunoco teehinohallivi, pisirigaño hallivi icano tucaruuhi. Jaaneri inifaihuno tiihohoti minifutuuihi.

⁵ Jaanaa guubuui diiboro unuonoco: Aivojiibo Moocaani, ijoho aivo imino omoonifiibo, idiimiibo icano. Jaabo idiicaabo, bu idiicaubo icano. ⁶ Miiro diito iidiro iicaumoco, bu dijiibogoco ihimaamoco icano itijohoco agañiumoro gujenuuhi. Jaamaño ijoho jisumi diitoco tiihohoco diisuhi tolli diito imogomaño, nooboro.

⁷ Jaanaaca bu guubuui saafi Moocaani jeecivobuje iicauhigoti unuonoco: Jii, Aivojiibo Moocaani sihidi mityama idiicaabo, miyaanohalliti imino moonihi, nooboro.

⁸ Jaanaa allivioobo bu iguirihillufaño iicaunoco nihibahallivi tucaruuhi. Jaaboro inihibaco mityaco acubo miyaminaaco ihaiguucuri ijigasujui.

⁹ Jaaneri paryi miyaminaaco ñihicuuno jigasuubo. Jaarunofaño iimitico jeevesuutimo, bu Moocaanico imuutimo icano; jilliro diibediti idicunoono iimaamo toono ñihicuunoono imitihallivi mityama iicaubediti.

¹⁰ Jaano allivioobo iguirihillufañ o iicaunoco oono ñihicuubo aivoji icagahallivi tucaruuhi. Jaaneri diibo aivoji jiinije cironoguiino minifutuuihi. Jaanaa miyaminaa aavovomoro cuhufono imicicifotomoro majaabicinicibadiro diito inehejebanoco jimicamaaihicauihi. ¹¹ Jaarumo iimitico jeevesutimo omoonimoro Moocaani niquejefañ o iicaabediti imitinoono iimaauhi iciniisiino, bu aivono icanohalliti.

¹² Jaano allivioobo bu iguirihillufañ o iicaunoco sihidi ejeevamuuai Eufrate noomuuafañ o tucaruuhi. Jaaneri tumuuai fiigatyuuhi jiihaiti iminifetequi tojiri aamijjaagoti jiinije aivojito isaaqui.

¹³ Jaadi atyimeuhi dragon ijifañoti, bu ñihicuubo ijifañoti, bu jihovo iimaaminaafi ijifañoti icano inuumoco, miimisiici, saafi idiimova iimitino gaijami jacucugamibadi jeevamoco. ¹⁴ Jaamo diitou iji gaijami sihidi ejeevanehejeque omoonihicaumo, bu jiinjeminaa aivojitoco igaiyiicituumo Moocaani sihidi ejeevaaboma ihamocasiqui. ¹⁵ Jaanegui mehesicini uujoho gaajaciratino saaji nanivaminaafi asaanicibadi. Imicani icajiibo ifico imino imibachuubo gaachehuco imibachunicibadi. Jaabo icigatiibo iicanicibadi teemejiibo. Jaabo nucufeguecujitiibo sicaibo iicaabo iicanicibadi. ¹⁶ Jaamo diito imitino gaijami aivojitoco igaiyiiciuhi hebreamo ijiri Armagedon onoomañovi.

¹⁷ Jaanobuunati niinoobo iguirihillufañ o iicaunoco tucaruuhi sicaisituvi. Jaanaa niquejefañ o iicaja iimimañoti Moocaani aivoji icagati sefano ununo guubuvusuuhi. Fine imivocafutucuuno, noonoro.

¹⁸ Jaasumiro sihidi namebauno, bu jiinije ñihicuno guubuvusuuhi, bu sihidi sisiimi icauhi icano. Jaaneri sihidi sefano jiinije maryibauhi jiinjehalliri miyaminaa iicanoti amaryibahicauno janaanicivi. ¹⁹ Jaaneri sihidi ejeevacuumi dujavavuhifeenedi minooci, sano idiino. Tolliro bu jiinije miyaminaa cuumino callajanamaaiuhi icano. Jaadi bu Moocaani sihidi ejeevacuumi Babilonia cuumiti esafutuuihi. Tuucuumico isifiirafaihuco ifayiisuqui tuucuumijaago isifiiratuuboro agalluufaihuco. ²⁰ Jaaneri bu ifachugañ o, bu ifabaino icano buuhicauno. ²¹ Tolliro bu miyaminaahallivi niquejefañ o guiisibanobadi ejeevano aifuuhi. Jaanaa saba boci cuarenta kilodino icauhi. Jaanohalliti miyaminaa Moocaanico: Imitinoono, nuuhi jihishitineri diitoco idaasuno omooniuohalliti.

Sihidi Ejeevano Ajevaminaagoco Ahaamino.

17 Jaanaa tajaago saaubo oono Moocaani toomominaa sifiira guirihillunoma iicaumoti saafi. Jaaboro uco nuuhi: Juu disaa, ico iifusuqui oono sihidi ejeevano ajevaminaago muuainohalliri igicinigoco ahaaminoco, nooboro. ² Miiro jiinjeminaa aivojito diigoma imitino ahaicahi. Jaaneri jiinjehalliri iicamo diigo ajevafaihuri guiriicavehicahi.

³ Jaanobuunati Moocaani Gaija uco iifusuunofañ o Moocaani toomominaafi uco sicaihigovi satyuuhi. Jahigo atyimeuhi gaigooco ñihicuubo tifaibohalliri gicinigoco. Jaabo ñihicuubohalli sihidi caatiniciniuno Moocaaniditi idicuno ononeheje, bu jaabo nigaino sahuse juugahuseti miyiici idiino, bu fahuseecidino iinicuno icano. ⁴ Jaago diigo diibohalliri igiciniugo jiiiciniuhi tifaihiba iicachehuri, bu atyvachehuco icano. Jaago imibaiquimaaciniuhi orori, bu iminoono guisiyineri, bu perlari icano. Jaago gaayiciniuhi oro guirihilluco iidicuneneri, bu ihajeva idicuri icano gatyuuci icahilluco. ⁵ Jaago imecuri caatiniciniuno itihino momo: Sihidi ejeevano Babilonia cuumi ajevaminaa seeji, bu paryi jiinjehalliri iicano iidicunoono seeji icano, onono.

⁶ Jaadi uujoho gaajaciuhi diigo Moocaanita iicamo tiijeheri, bu Jesu miyaabo iicanoco ijiiibeguehicaumo tiijeheri icano imo iicagoro guiriicavocinigoco. Jaanoco aatyimeuboro sihidi jabafituuhi.

⁷ Jaaneguiiha Moocaani toomominaafi uco nuuhi: ¿Collihi daabafitehi? Ico uujoho gaajasuji oono itihiiino diigoco adaatyimene milli eneejirunoco, bu iñihicuubo sahuse juugahuseti miyiici idiino, bu fahuseeci iinicuno iicaabo diigoco ifiiseebeti icano. ⁸ Diibo iñihicuuboco adaatyimeebe johono iicahiniibo. Jaaruubo jisumi chahacuhi. Jaaruubo siino iñihicuhujifañoti saajiibo ifinicujihigovi efeejino imegavi. Jaaneri jiinijehalliri iicamo jiinije ifiivunotiro fiivohaamefaño imomono achahamo sihidiro jabafiteji oono iñihicuubo iicahiniibo, achahacuubo, siino asaadi.

⁹ Jimañeri onoonoco gaajama iicamo gaajaji: Miïro oono inigaino, sahuse juugahuseti mibaici idiino ifabaino iicanoco eneejiruno: Tobaijehalliri diigo igicinibajediti. ¹⁰ Jaayijere bu sahuse juugahuseti miimisiici idiino aivojito iicamediti eneejiruno. Jaamoti sahusedimo finicuuhi. Jaanoti saafi jino icahi. Jaanoti saafihiica gasetihi. Jaaruubo agasedi guenene icajitih. ¹¹ Jaabo oono iñihicuubo iicahiniibo, achahacuuruubo diitobuunati asaajiibo aivojiboti iicaqui. Jaaboma ochodimo minifetejimo. Jaabo bu diito sahuse juugahuseti miimisiici idiino iicaumooboro. Jaadi feejiibo ifinicujihigovi.

¹² Jaanoti bu fahuseecidino iinicunoco adaatyimene fahuseecidimo aivojito iicajimoco onoono. Jaamo tajiibatihica. Jaarumo sano nihiba oovoti aivoji iijico gaayicijimo sano oono iñihicuuboma. ¹³ Jaamo diito aivojito sabadi ihiimaamoro imitya, bu ihaivoji icanoco oono iñihicuuboco acijimo. ¹⁴ Jaamoro Corderobadi iicaaboma amocasijimo. Jaarumoco Corderobadi iicaabo guinoniji, miïro diibo aivojito Aivojiibo, bu tajiibaminaa Tajiibaminaafi icano iicamaño. Jaaboma iicamoco Moocaani ocoovaboro icihu. Jaamo diiboco jeevesutimo icahi, nooboro.

¹⁵ Jaadi bu siino uco nuubo: Johono muuaiñooco ajevaminaago tumuuaijehalliri gicinigoco adatyimemuuaije oono cuumino miyaminaa, bu fanoohiji miyaminaa, bu jiinijeminaa icano. ¹⁶ Jaabadiro bu oono iñihicuubo nigainohallivi fahuseecidino iinicunoco adaatyimene ajevaminagoco ijiihevenere sicaiigoco jeevesujimo, bu tolliro diigo uucunoco uduumoro diigoco cijigaifaño jigasujimo icano. ¹⁷ Miïro Moocaani diito jeebiifaño ficuji diibo iimogobadi diito imooniqui. Jaamaño sabadiro ihiimaamoro ihaivoji iijico iñihicuuboco acijimo Moocaani unuuno imivocafotonohachuta. ¹⁸ Jaanoti bu gaigooco adaatyimene oono sihidi ejevacuumi jiinije miyaminaa aivojitoco atajiibahicacuumiti onoono, nooboro.

Babilonia Cuumi Ifinijino.

18 Jaanobuunati atyimeuhi Moocaani toomominaafi sihidi mityama iicaabo niquejefañoti iniituunoco. Jaabo seseene jiinijeque achicuhi iharicuri. ² Jaabo sefano nuuhi: Acutucuuno, acutucuuno sihidi ejevacuumi Babilonia cuumi ijimi ijanotiro fiivutucuuno, bu fanoohimiti gajami ijanorucu, bu faaboho jooi agahafomo iidicufiimo, bu ijiihechufiimo icamo ijanurucu icano. ³ Miïro paryi jiinijeminaa tuucuumi ajevafaño imo imo icahicahi, bu jiinijeminaa aivojito diigoma ihajevari imitineheje icahicahi, bu jiinije naajeminaa tuucuumi imiti naajeteque omoonimoro sihidiro nihibamivahicahi icano, nooboro.

⁴ Jaadi siino guubuuihi niquejefañoti unuunoco: Amiihai taty mihicamo tuucuumi mihiino mihicadino, bu tuucuumico idaasuno omoonijino amiihaivi ifetedino. ⁵ Miuro tuucuumi imiti ajashutino jiiñijeti niquejevi ifutucuuihi. Jaaneri Moocaani diigo imitico esafutucuuihi. ⁶ Jaanegui diigoco mahaci oono saatothoco diigo aacihicabadiro buuna. Bu diigoco majaadu oono diigo omooniuo allinoocivi. Bu oono diigo sitaaco iimitino eheetavehicano janaanicivi meheetavo diiguedi. ⁷ Sihidiro aivono, idaasuno icano diigoco momooni oono diigo sihidi mitya icahicagoro, sihidi imitico iimogogoro omoonihicano ticovovi icano. Miuro diigo ijeebiiñañodi neehicahi: Jino uujoho aivogijobadi icahi, bu uujoho fibajjigo iicatimaño idaasuno icajitihii, noogoro. ⁸ Jaamaño safucudiro diigoco idaasuno omoonijino ihallivi gaseji: gujeve, bu idaasu, bu ajeba, bu cijigairi jigasucafetjigo icano. Miuro jishitiibo Moocaani diigohallivi jilli neehi.

⁹ Jaaneri jiiñijeminaa aivojito diigoma iicahicamo, bu imitico sihidi iimeguehicamo icano ataacasimoro sihidi diigueri idaasuveji diigo ijigano aimuufaico aatyimemere. ¹⁰ Jaamoro diigoco idaasuno omoonino ñihicuti tehesino iicahigoti neejimo: ¡Ay! Idaasucani diicahi, ijoho Babilonia cuumi iguiracuumi, sihidi edeevacuumi. Dihallivi sano goovanogayi ico idaasuno omoonino gasehi, noomoro.

¹¹ Bu tolliro jiiñije naajeminaa tuucuumico iidaasuvomoro taacasiji diito inaajeteque isivanoco miihaiñooba anaajecuujitineri. ¹² Jaano diito naajetene: oroneheje, plataneheje, bu oovosiino guisiyineheje, perlaneheje, bu iiminoono gaachehuboogano, sedaboogano, aatyivaneheje, bu tifaihibi iicaneheje icano, bu tolliro fanoova imohono afacicinoono, bu marfilneheje, bu iimino imohono, bu bronceneheje, jigaiñoneheje, bu ucuhufono guisiibano marmol ononeheje, ¹³ bu canelaneheje naajete, bu afacicinoono, maaniguiijino, mirraneheje, facicifaihuno, vinofaihuno, diiribano, bu harinaguiijino, bu ñaavaneheje, bu tolliro asiminaajeteneheje, ovejami, caballomi, bu carrono, bu miyaminaa jijovotehejeque icano.

¹⁴ Jaamoro tuucuumico neejimo: Ijoho sihidi idimeguehicano chahacuuihi, bu fahijivaro chahacuujino sihidi dibusumije, dihovosineheje icano, noomoro.

¹⁵ Paryi jinehejeque tuucuumico anaajemere sihidi inihibamivahicamo tehesinotiro iicajimo tuucuumico idaasuno omoonino ñihicuti, ihidaasuri ataamoro neejii: ¹⁶ ¡Ay! Idaasucani sihidi ejeevacuumi icahi. Miuro gaigo imichehujefaño, itifaihibi iicachehujefaño, aatyivachehujefaño icano jiiñinigo, bu orori, imino guisiyineri, perlari icano imibachucinigobadi jeevauhi. ¹⁷ Jaano ajashutino busumije milli goovanogayi finihi, noomoro.

Jaabadiro bu paryi cijigameenene aivojito bu togajeri igomo, bu togaje dudicamaajeminaa, bu paryi muuañoño uduedicamaimeheje icano tehesinoro jullecamaajiji. ¹⁸ Jaamoro tuucuumi ijigano aimuufaico aatyimene idaasuri coovadiivejimo: ¿Cuucuumi aivo jiiicuumi ivibadi iicacuumi chahahi? noomoro ¹⁹ inigainohallivi jiiñinoco gavaracuujii iidaasuvomoro, taacasimoro gaibacasiji: ¡Ay! Idaasucani sihidi ejeevacuumi icahi. Miuro tuucuumi busumijeri paryi muuaifaño icijigameenenema icamo sihidi nihibamivahicahi. Jaacuumi milli goovanogayi finihi, noomoro.

²⁰ Jaarunofaño amiihai niquejefaño iicamo tuucuumico mihimoba, bu amiihai Moocaani minisuminaa bu mihimoba, bu paryi Moocaani ijico

mijibeguehicamo, bu diibota mihicamo icano. Miïro tuucuumico tolli omoonineri amiihaino jaadaco Moocaani icïhi, nooboro.

²¹ Jaanaaca Moocaani toomominaafi sihidi jeevaabo guisibatyigabaco gañiicyihuhi machuta cahasutaguisibatyigababadi iicabaco. Jaaboro muuaifaño gañiuhuhi, jilli nooboro: Jilli gañiicafetejicuumi baavi sihidi ejeevacuumi Babilonia cuumi. Jaacuumi siino ufucuro atyimeracujitihi. ²² Bu ufucuro dijiihainoñaño arpa, bu siru, miriicuno icano guubuvusucuujiitihi, bu fanoodudicamaajeminaa, bu machutaaco acahasuno guubuvusucuujiitihi icano, ²³ bu ico achicinihicano ciijigaimecuno ifuvusucuujiitihi, bu ufucuro iivi guubuvusucuujitino taabava jibaimo masino icano, dinaajeminaa sihidi ejeevamo paryi jiinije miyaminaaco dihapichuner abañihicaumaño.

²⁴ Miïro tuucuumifaño Moocaani iijico ijiibeguehicaumo tiijohoco agañiuno atyimecafetehe, bu tolliro Moocaanita iicamo tiijoho, bu paryi jiinijehallivi agaicaauhicamo tiijoho icano, nooboro.

19 Jaanobuunati niquejefañoti sefano sihidi miyaminaa unuunoco guubuuhu:

iAleyua! Itaajasu, iimi, imitya icano paryi Moocaanino.

² Miïro diibo imino miyaanoro emeeçiboro dugaacufihi.

Miïro sihidi ejeevano ajevaminaago jiinijeminaaco ihajevari imihininigoco, toono jaadaco acicuubo. Ijeecivominaa tiijohoco agañiuno jaadaco icicuubo, noomoro.

³ Jaadi siino sefano nuumo: iAleyua! Diigoco ijigasuno aimuufai suufenitino aimuui, noomoro.

⁴ Jaadi bu veinticuatro dïmo quillahuto iicamo, bu igueenemehejedimo iicamo icano jiinijehallivi ajavucamaaiumoro Moocaani ihaivoji icagahalliri iicaaboco imuumoro neehicauhi: iFine! iAleyua! noomoro.

⁵ Jaanaaca Moocaani aivoji icagajaagoti unuunoco guubuuhu: Moocaanico mihimo paryi amiihai diibo jeevivominaa, diiboco mihiguimo mequehefimo, bu munumefiimo icano, noomoro.

Corderobadi Icaabo Jiibaimo Iicajino.

⁶ Tolliro guubuuhu sihidi miyaminaa ihiimaabadi iicano, sefano guubuvusuuhi guisino uguubuvusunicibadi iicano, bu sefano sisiimi igiiriribanicibadi icano, jilli neehicauhi:

iAleyua! Aivojiibo Moocaani sihidi mityama iicaabo

atajiibacumaño. ⁷ Masii imono mihicamoro imo imo miicaqui. Jaamoro diiboco macahacisuqui.

Miïro jino Corderobadi iicaabo taabava jibaimo iicajino gasecuuhi, bu mogai iicajigo imibaivucuuhi.

⁸ Jaagoco iimino gaachehu, mihinivatichehu, aricuchehufaño jiïhacucuumo, noonoro.

Jaano toono iimichehufaño jiïhacuno onono Moocaanita iicamo mihinivatimo iicanoco eneejiruno.

⁹ Jaadi uco Moocaani toomominaafi nuuhi: Jinooco bu caatini: Imicani icajimo Corderobadi iicaabo taabava jiibaimojaagovi ucuuhuvamo, nooboro.

Jaadi bu uco siino nuubo: Jino Moocaani iiji aivo miyaano iicano, nooboro.

¹⁰ Jaanegui uujoho diiboguino memuiivuuhi diiboco imequi. Jaarunaa uco nuubo: Tolli moonidino uujoho, bu tolliro Moocaani jeevivominaafi

ijjoho idiicabadiro, bu dinahabomi Jesu jii bogoco suufenitimo ijii beguehica moadiro icano. Jaanegui Moocaanico diimo, nooboro.

Miuro toono Jesu jii bogoco ijii bogomo Moocaani iimaa jii bogominaa.

Eseene Caballohalliri Iicaabo.

¹¹ Jaadi atyimeuhi niqueje faayiciniunoco. Jaanofaoti inuubo sesebe caballo. Jaabohalliri iicaubo momou Abañitatiibo, Miyaabo icano. Jaabo imino atajii bahicaaboro miyaano iimitinoco iguiinoniqui minaaco eheetavefiibo. ¹² Jaabo aalliino cijigaiguihunobadi jeevauhi, bu inigaihallivi sihidi chaahimigano icauhi, bu imomo caatiniciniuhi. Jaamomoco idiiboro diibo gaajauhi. ¹³ Bu jaabo tii johori jeesucinichehufañi jii cinuhi. Jaabo momou Moocaani iimaa. ¹⁴ Jaabo dojicuti fuumo niqueje amocasiminaa imichehuje, mihinivatichehuje, sesechehufañi jicucuciniimo. Jaamo bu tolliro seseefiimo caballomihalliri icaumo. ¹⁵ Jaabo ijifañoti siijevaga niisuga inoociniuhi. Togari jii nijeminaaco iguiinoniqui. Jaaboro tajiibajiibo jigaiñohiri iicanicibadi. Jaaboro aamijiibo oono baacufaihuco ihiciqui itihairi iquicunicibadi. Jaaboro diitoco Moocaani imityaabo idaasuno mooniji. ¹⁶ Jaabo idihallivi igachehuti caatiniciniuno aivojito Aivojiibo, bu tajiibaminaa Aivojiibo icano onoomomo.

¹⁷ Jaadi bu atyimeuhi saafi Moocaani toomominaafi nihibahalliri julleeciniiboco. Jaabo sefano coovadiivuhi paryi joomi asimi niquejeguiinodi agahafomoco: Masaa. Jaamoro mihigaivova ajashutino Moocaani machutajaagovi. ¹⁸ Jaamo aivojito uucunoco, amocasiminaa aivojito uucunoco, bu esefafiimo uucunoco, bu caballomi uucunoco, bu diitohalliri iicahicamo uucunoco miyaamo uucunoco, bu jii jovoto uucunoco bu unumefiimo uucunoco, bu equehefiimo uucunoco icano muduuva, nooboro.

¹⁹ Jaadi atyimeuhi iñihicuuboco, bu tolliro jii nijeminaa aivojito ihamocasiminaama igaiuumoro oono eseene caballohalliri iicaaboma, bu diibo amocasiminaama icano imoonicasiqui asaumoco. ²⁰ Jaadi iñihicuuboco, bu jihovo iimaaminaafico icano sano agaayiciuboro sisiibo. Jaabo diibo jihovo iimaaminaafi iñihicuubo imegavi jabafiiranehejeque omoonihicaubo. Tonehejefenedi diibo jihovo iimaaminaafi miyaminaaco bañihicauhi oono iñihicuubo oovotaco agaayiciumoco, bu jaamoro diibo ijico iiumumoco icano. Jaamisico gañiubo buheemisico cijigai jicooba azufrema ijigabafañi. ²¹ Jaanoti diitisi yoto guijenica futuuhi oono eseene caballohalliri iicaubo ijifañoti niisuga iinociniugari. Jaamo uucuneri paryi añimi sihidiro tuvauhi.

Mil Año Ticovovi Imino Iicajino.

20 Jaanobuunati atyimeuhi Moocaani toomominaafi ihusefani iñihicuhoji llave, bu jigaiñehityigaba icanoma niquejefañoti niituuboco. ² Jaaboro dragonco agaayiciuboro tohiri sisiuhi. Jaaboco siicijeo jii nimo, iji, Satanas iicaaboco mil año ticovovi ficuubo. ³ Jaaboro diiboco iñihicuhojifañi agañiuboro ihallivi maaniniuhi. Jaaboro tuhuga imega igajataco ficuuhi siino miyaminaaco bañicuutiibo iicaiqui mil año

f 19.14-15: Griego ijiri noono: Jaaboro diitoco iisujiibo Moocaani imityaabo sifiira aivofaihuco.

ticovovi. Jaadi mil año afatyonobuunati siino sinaayucafetejiibo. Jaaruubo gueneene icajitiibo.

⁴ Jaanobuunati atyimeuhi sihidi aivoji icagano iicanoco. Jaanohalliri giciniumo itajiibaqui mityaco agaayiciumo. Tolliro bu atyimeuhi johono Moocaani iijico Jesucristofañodi ijiiibeguehicaunohalliti inigainoco iquitiumo jeebiinoco. Jaamo diito inihicuuboco, bu ihijico icano imuutihi. Tolliro bu diibo oovotaco ficusuutimo ihimecuti, bu ihuseti icano. Jaamo ubuheeteumoro Cristoma mil año ticovovi tajiibauhi.

⁵ Jaano toono iticonio buheete iicajino. Jaanoti saatoho uchuuumucuumo buheeteutihi. Jari toono mil año afatyonobuunati buheetejimo. ⁶ Imicani icamo Moocanidiro iicamo Jesu buheetebuunati iticonio buheetefañodi iicajimo. Jaamohallivi allivio guijeve imityama chahaji, diitoco cijjigaifañodi agañiijirunoma. Jilliro ivi Moocaani Cristo iicamisi sacerdotemitiro icajimo. Jaamoro diiboma mil año ticovovi tajiibajimo.

⁷ Jaano toono mil año afatyonobuunati Satanas siino sinaayucafeteji inihicuhofañoti. ⁸ Jaadi feejiibo paryi jiiinijeminaaco ibañiqui. Jaaboro Magog cuumi, bu Gog cuumi icano iyotoma bañitejiibo. Jaaboro tuucuumici amocasiminaa ajashutimo muuaiño jiiinigiayihaiñobadi iicamoco igaiyicijjiibo minaaguiha. ⁹ Jaadi saajimo jiiinijejinibacidi. Jaamoro Moocanita iicacuumico, Moocaani agaijicuumico, Jerusale cuumico cabaacujimo. Jaarumohallivi Moocaani cijjigaico agalluuno paryi diitoco jigasuji. ¹⁰ Jaanoti iji diitoco abañiuboco gañiijjiibo cijjigai azufrema ijigano jicoobafañodi; oono inihicuubo, bu jihovo iimaaminaafi icamisico agañiubafañodi. Jahigo idaasuno aivono moonicafetejimo fahijivaro cuujehachuta, fucuhachuta icano.

Sihidi Ejeevano Eseseene Aivoji Icaga.

¹¹ Jaadi atyimeuhi sihidi jeevano seseene aivoji icagaco, bu togahalliri igiciniuboco icano. Jaabo imefeneti niqueje, jiiinije icano sano finiuhi atyimeratino. Jaamaño diito iicaujirumaño atyimerautihi. ¹² Jaadi atyimeuhi paryi iguijevehicaumo unumefiimo, bu equehefimo icano sahigo Moocaani imefeenevi jullelleecinimoco. Jaadi faayiciumo aameneque, tolliro bu sihaame fiivohaameque icano. Jaadi uchuuumucuumo jaaducafutuuhi omoonihicaunoco toohaamejefañodi iicaubadi. ¹³ Jaasumi iguijeveumo teehinofañodi, bu muuaiño icano buheeteuhi. Jaabadiro bu famooro iguijeveumo jeebiino buheeteuhi guijeveminaa iicahicaumañoti. Jaamoco paryi jaaducafutuuhi omoonihicaunehijeque emeciiboro. ¹⁴ Jaadi guijeve, bu guijeveminaa iicahicaumaño icano gañiicafutuuhi cijjigai jicoobafañodi. Jaaba toba cijjigai jicooba allivio guijeve icano. ¹⁵ Jahigo bu tolliro gañiicafutuumo fiivo aamefañodi imomono acaatinirautimo icano.

Bohono Niqueje, Bu Bohono Jiiinije Icano.

21 Jaanobuunati atyimeuhi bohono niquejeque, bu bohono jiiinijeque icano. Miiro iticonio niqueje, bu iticonio jiiinije icano ifinicuumañodi, bu tolliro muuaiño chahacuui icano. ² Uujoho Jua, atyimeuhi iimino cuumi, bohono Jerusale cuumi niquejefañoti Moocaani imefeneti iniituumico. Jaacuumi imino imibachuciniuhi gaigo itajevaqui iimibaiquimaainicibadi. ³ Jaanaaca niquejefañoti sefano unuunoco guubuuhi: Meeci, jino Moocaani miyaminaafeeneri jisumi

iicacuunoco. Jaabo diitoma icajiibo. Jaanoti diiteji diibo cuumiminaa icano. Jaabo Moocaani diitoma icaji diito Caaniti iicaqui icano. ⁴Jaamo taafiirafaihunoco Moocaani filluji. Jaadi siino guiyeve chahacuuji, bu taafiira chahacuuji, bu idaasuhiica, bu aivehicano chahacuuji, eedeene achahacuuji maño, noonoro.

⁵Jaanaaca ihaivoji icagahalliri igiciniubo nuuhi: Meeci, paryi uujoho bonehejeque eetavehi, nooboro.

Jaadi bu nuubo: Caatini, jino aivo miyahijji aivo miyaano iicano, nooboro. ⁶Jaadi bu uco siino nuubo: Fine, imivocafutucuuno. Uujoho imegaooobo, bu allivioobo icano, oono A, Z icano iicabadi iicaabo. Jaabo uujoho adufirari iicaaboco pisirigai nifaihu fiivoco aacifaihuti isuuji jaadusuratino. ⁷Bu mitiano iicamo paryi toonoco gaayiciji oono caani busumijeque illi agaayicinicibadi. Jaamo Caaniji uujoho. Jaanoti diiteji taseeme icano. ⁸Jaanoti iñihicuguehcamoco, bu imiyaaveguehcatimoco, bu fanoova imitiminaaco, bu agaicaaufihcamoco, bu gaigoomima imitinoono iicahicamoco, bu apichunoco ihiimaahicamoco, bu jihovo caani ijimico ejeecivehcamoco, bu paryi abañifihicamoco icano gañijimo ciijigaima azufre ijigano jicoobafaño. Jino allivio guiyeve iicajino, nooboro.

Bohono Jerusale Cuumi.

⁹Jaanaaca Moocaani toomominaafi sahuse juugahuseti miimisiici idiimo niinoono Moocaani sifiira guirihillunoma iicaumoti saafi tajaa asaaboro uco nuuhi: Juu disaa ico Corderobadi iicaabo taaba iicagoco iifusuqui, nooboro.

¹⁰Jaano toono uco Moocaani Gaija iifusuunofaño atyimeuhi Moocaani toomominaafi uco caamovobai guiraabai nijequevi asatyuboro ifusuhi iimeino cuumi sihidi ejeevacuumi, Jerusale cuumi niquejefañoti Moocaani imefeeneti iniitucuumico. ¹¹Jaacuumi seseene achiciniuhi Moocaani aricuri. Jaano iharicu ifuvusuhi imino guisiba aricubadi, jaspe guisiba aricu imino oonogoonovi iifuvusunicibadi. ¹²Jaacuumihallidi kuhufono guisiri meegueciniuno ajashutino caamovono. Jaanoti icauno fahuseeci motihaiti mihugaaci idiino. Jaahugaje ticovovi Moocaani toomominaa saafiisa icauhi, bu jaahugajehallivi Israel cuumino fahuseeci motihaiti miicumici idiino iicacuumije momono caatiniciniuhi icano.

¹³Jaano aamijinaagoocuumiti icauno mihugaaci, sahuga idiino, bu nijequenaagoocuumiti icauno mihugaaci, sahuga idiino, bu sanaago gaicujaati mihugaaci, sahuga idiino, bu sinaago gaicujaati mihugaaci, sahuga idiino icano. ¹⁴Jaano tuucuumihallidi fahuseeci motihaiti miibaaci idiino guisibaneri eetavociniuhi. Jaanohallidi imeegueta icauhi. Jaabaajehallivi Corderobadi iicaabo minisuminaa momono caatiniciniuhi.

¹⁵Jaabo Moocaani toomominaafi uuma ihiimaahicaubo oro imeima icaubo tuucuumico iheveequi iguhuganoco, bu imeeguetaco icano. ¹⁶Jaacuumi tehesi sanoodinoruu, bu icarecu, bu icaamovo icano sahachutaruu. Jaacuumico Moocaani toomominaafi ihimeiri uhuuvuuno aciuihi, dos mil doscientos kilometrohachuta. Jaano itehesi, bu caamovi icaamovo, bu icarecu icano samañoviruu icano. ¹⁷Jaadi bu imeeguetaco uhuuvuuno icaamovo aciuihi sesenta y cuatro metrodino miyaminaa oovonicyomoneri Moocaani toomominaafi uhuuvuuno. ¹⁸Jaanaa imeegueta jaspe guisibaneri eetavociniuhi. Jaanoti ifaacuumiu boti orori nicuciniuhi. Jaano vidriobadi mihinivatino ifuvusuui. ¹⁹Jaanoti bu imeegueta tano guisibano fanoova

iminoono guuisibaneri imibachuciniuhi: Iticoniooba jaspe guuisibari imibachuciniuhi; jaano allivioba zafiro onoono guuisibari imibachuciniuhi; jaano allivioba agata onoono guuisibari imibachuciniuhi; jaano allivioba esmeralda guuisibari imibachuciniuhi; ²⁰ Jaano allivioba onice guuisibari imibachuciniuhi; jaano allivioba cornalina guuisibari imibachuciniuhi; jaano allivioba crisolito guuisibari imibachuciniuhi; jaano allivioba berilo guuisibari imibachuciniuhi; jaano allivioba topacio guuisibari imibachuciniuhi; jaano allivioba crisoprasa guuisibari imibachuciniuhi; jaano allivioba jacinto guuisibari imibachuciniuhi; bu niinooba amatista guuisibari imibachuciniuhi icano. ²¹ Jaanoti iguhugano docedino iicano perlanorou. Jaahugaje iticovoocivi sano perlariro eetavociniuhi. Jaanoti tuucuumifeene jiihai sano ororiro eetavociniuhi, imino vidriobadi foovono onooگونوovi ifuvusuuhi.

²² Jaacuumifaño templojaco atyimeutihi Aivojiibo Moocaani sihidi imityaabo, bu Corderobadi iicaabo icamisico famañovaviro tuucuumifaño mejeciveji. ²³ Jahigo cuujeo nihiba, fucuo nihiba icano chahaji Moocaani inamecuri tuucuumico ahachicinimaño, bu Corderobadi iicaabo tuucuumico aachiciniibo iicamaño icano. ²⁴ Jaacuumi seseefañodi jiiinijeminaa ataaajasucafutuumo igueji. Bu jiiinijeminaa aivojito tuucuumijaago imitya, iboci icanoco satyeji. ²⁵ Jaacuumi guhugano fobocirahicajitihi tahigo fucu achahacujimaño. ²⁶ Jahigo jiiinijeminaa imityaco, ibocico icano satyeji. ²⁷ Jaanoti imihinivanoba tahigo feejitihi, bu iidicunoonoco, bu bañifiraco icano omoonihamo tahi feejitihi icano. Jaanoti naha idiimoro Corderobadi iicaabohaame fiivohaamefaño imomono acaatinicinimo feeji.

22 Jaadi bu uco iifusuubo muuai imino inifaihu fiivoco aacimuuai. Jaamuuai nifaihu jaacuhi cristalbadi icahi. Moocaani, Corderobadi iicaabo iicamisi aivoji icagati iinoociniuhi cuumifeenedi. ² Jaacuumi iicauji jiihai imiyaji guirraaji. Jaaji guirraaro tumuuaijinicidiro icaji. Jaanojinivi fiivo imohooci icahi fanaagovaacijjinivi. Jaahooci faficabavaviro ifanihibava ticovovi noova icahi fanihibavaviro. Jaahooci aamene jiiinijeminaaco itabuqui iicano. ³ Bu jahigo afaijacinino chahaji. Tuucuumifaño Moocaani, Corderobadi iicaabo iicamisi aivoji icaga icaji. Jaamisico ijeecivominaa imehicaji. ⁴ Jaamo bu diiboco faño ihimeque atyimehicaji, bu diibo momo ihimecunoti icanoma icajimo icano. ⁵ Jahigo fucu chahaji. Jaamaño tuucuumifaño iicamo siino seseque esucujitihi ciijigaimecuno seseque, bu nihiba seseque icano esucujitihi Aivojiibo Moocaani diitoco ahachicinijimaño. Jahigo diito fahijivaro aivojitoti icaji.

Jesucristo Asajino Fiiticuuhi.

⁶ Jaadi bu uco siino Moocaani toomominaafi nuuhi: Jino aivo miyahiji. Jaanoco aivo mimiyaavogo. Diiboro Aivojiibo Moocaani ihimaaminaaco, Igaajaco aacifiibo itoomominaafico jino galluuhi ijeecivominaafico ihifusuqui goovano iicajinehejeque.

⁷ Uujoho goovajino asaano, noobo Jesu. Imicani icajiibo jiihaamefaño Moocaani jiiibogo acaatinicinino onoobadi omooniibo, nooboro.

⁸ Jaabo uujoho Jua jinehejeque guubuui, atyimeuhi icano. Jaadi diibo Moocaani toomominaafi tonehejeque uco iifusuboguiino memuivuuhi diiboco imeequi. ⁹ Jaarunofaño uco nuubo: Tolli moonidino. Miuro uujoho Moocaani jeecivominaafi iibadiro, bu oono dinahabomi Moocaani iijico iijibeguehicamobadi, bu paryi oono jihaamefaño acaatinicininoco imiyaaveguehicamobadi icano. Jaanegui Moocaanico dihimo, nooboro.

¹⁰Tolliro bu uco nuubo: Jino Moocaani jiiibogo jihaamefaño acaatinicinino toovono ficuudino. Miiro fiiticuujino toneheje icano.

¹¹Jaanequi jaafa iimitiibo iimitico mooniiboro icahi. Jaanoti bu iidicuubo jaafa ihidicuunoco mooniiboro icahi. Jaanoti bu iimiibo jaafa iiminoco mooniiboro icahi. Jaanoti bu Moocaanidiro iicaabo diiboco jeevesutiibo iicaqui.

¹²Jiíhi goovajino asaano, noobo Jesu. Jaabo uujoho sivaji paryi omoonihicaneheje jaadaco diitoco aaciqui. ¹³Jaabo uujoho imegaooobo, bu allivioobo icano, bu iticonioobo, bu nijequeoobo oono A, Z icano icabadi iicaabo, nooboro.

¹⁴Imicani icamo imifiiutumoco iimitusucuumo fiivoco aacino imohoti imachuqui, bu iguhugari tuucuumifaño ijicafetequi icano. ¹⁵Jaanoti iidicufimo, bu apichuco ihimaahicamo, bu gaigooma imitinoono iicafifimo, bu sitaaco agaicaaufifimo, bu jihovo ijimico ejeevifimo, bu paryi famooro bañifiraco iimogomoro omoonifimo icano buhigoro icaji.

¹⁶Jaabo uujoho Jesu tatyoominaafico galluuhi paryi jineheje Moocaani iijanominaaco ijiiibeguequi. Jaabo uujoho David tyadimihai tanoobo, bu iyaachimihaiobo icano. Bu tolliro uujoho aaricuubo cuujetavio meecirigaibadi jeevahi, nooboro.

¹⁷Jilli Moocaani Gaija, bu Corderobadi iicaabo taaba icano neehi: Disaa. Bu jaanoco muguubumo monoo: Disaa.

Bu adufirari mihicamo, mahadunoco mihimogomo masaamoro mahaduva. Jino ifinijitino fiivoco ticovono mahaciji jaadusuratino.

¹⁸Jaabadiro bu jihaamefaño acaatinicinino Moocaani iijico paryi uguubuhicamoco jino uujoho neehi: Cajaanoyhacho jihaamefaño ononehejeque janaanici ucuubaryuhachijiji, bu diitohallivi Moocaani galluuji isifiira idasuno omoonijinoco jihaamefaño enehicacuunoco.

¹⁹Jaabadiro bu saatoho jihaamefaño Moocaani iiji acaatinicininoti samañoooco agañihachijiji, diiboco fiivo imoho noovatati icitiibocoro imicumifañoti gañijiji. Jihaamefaño fiivo imohohallidi, bu imicumihallidi icano fone iimaacuui.

²⁰Jinehejeque ijiiibogoobo jilli neehi: Jiíhi goovajino asaano, nooboro. Jiíhi. ¡Disaa, Aivojiiibo Jesu!

²¹Jaafa Mohaivojiiibo Jesucristo paryi amiihaico imino moonihi. Fine.